

于總主教序

昔者程子有言曰：「獨處而靜思非難，居廣而應天下爲難。」予竊以爲不然，蓋不能獨處而靜思，未有能居廣而應天下者也。十餘年來，主席蔣公以百折不撓之精神，高瞻遠矚之卓識，領導我中華民族，集力禦侮，指揮若定，游刃有餘，而終克致勝，非所謂居廣而應天下者乎？願探原其本，要亦有賴乎獨處而靜思耳。最近報載蔣夫人在廬山語記者曰：「在抗戰期中，主席每日必讀新譯之聖經一章。此項新譯聖經，係用文言，而詩句尤稱雋永。」觀此益信主席之成功，實其平素之內心修養有以致之。猶憶數年前，主席囑吳子德生重譯新經及聖詠，吳子既銜命，即毅然摒擋一切，從事翻譯，博覽羣書，咀嚼經義，其探討之勤，用心之苦，亦云至矣。而吳子獨樂之不倦，日居斗室之中，而尙友古人，晤對恩主，深味聖訓，妥譯天書。予觀其所譯聖詠，有云：「優游聖道中，涵泳徹朝夕，譬如溪畔樹，及時結嘉實。」又云：「光明播心田，神樂湧如泉。」斯其吳子之謂歟。夫聖詠者，天下之奇書，而人心之寶鑑也。凡喜怒哀樂之情，悔罪感恩之意，皆有所詠，靡不曲盡其妙，而一歸於正。其原文之美，無論焉。即泰西各國之譯文，亦莫不具有文學價值，膾炙人口，溫煥人心，由來久矣。而我國譯本，類皆佶屈聱牙，讀之令人生厭。今觀吳子譯稿，清新俊逸，引人入勝，其喜也，則曰：「昔主擊衆」

俘。安然返聖地。吾儕當是時。驚喜同夢寐。心中饒甘味。舌端宣歡意。其樂也。則曰「靈膏沐我首。玉爵盈欲流。」其怒也。則曰「願其如蝸牛之消形兮。載行載滅。願其如胚胎之流產兮。不見天日。」其哀也。則曰「夜夜暗流淚。牀褥浥秋霖。目枯因愁多。骨消緣辱頻。」其悔罪也。則曰「爲我再造。純白之心。正氣內蘊。煥然一新。」其感恩也。則曰「偉哉造物主。待我恩何深。」「備承主之惠。盛德何以償。」其抒愛慕也。則曰「予心之戀主兮。若麋鹿之戀清泉。」「明發不能寐。耿耿懷所天。」其詠天主之全知也。則曰「神彌六合。靡所不包。聖顏普照。何所用逃。曰躍於天。主在雲表。曰潛於淵。主伏於沼。」其寫天人之契合也。則曰「仁慈共妙諦交歡。正義與和平吻合。妙諦自地而萌兮。正義由天而發。」其餘詠史說理。描寫自然之詩。亦皆栩栩有生氣。耐人尋味。既深得聖詠之神韻。且妙句天成。不見斧鑿之痕。非好學深思。身體力行。具天才而得神助者。惡能致此妙果。雖謂爲譯界開一新紀元可也。抑予尤不能已於言者。主席於萬幾之餘。三閱譯稿。予以修正。加以潤色。與吳子推敲字句。辨析疑義。切磋琢磨。不遺餘力。予觀其修正原本。見其字斟句酌。絲毫不苟。其改善原稿之處。不一而足。復爲集思廣益之計。乃有初稿之刊行。以徵求國內外經學專家以及文人學士之指正。是其虛懷若谷。從善如流之精神。爲何如乎。夫以一國之元首。重之以空前之戰事。竟能深思遠慮。躬親主持譯經之事。有史以來。未之前聞。今乃目覩之矣。此不特聖教之光。亦中華之幸也。

予恭讀修正原本。愛之不忍釋手。而於主席所欣賞及親譯之詩句。三致意焉。今請略舉數則。公諸同好。

雖在重圍。何所用懼。

萬物有涯。大道無垠。

嗟夫吾之能戰兮。非吾之力也。克服衆敵兮。仗主之德也。

列國與兆民。千算亦何益。何如主一算。萬古永不易。奉主之國必發達。承恩之民安且逸。

聖怒一時。慈恩永世。長夜悲泣。拂曉乃喜。

厥心堅固。惟主是怙。雖聞凶音。無有恐怖。惟真無畏。知敵必潰。

願爾氣無餒。仰主圖自強。

微主建爾屋。建屋徒自苦。微主守爾城。守城豈能固。

以仁爲居。以義爲路。康莊大道。衆庶所步。

行經悲谷。化爲甘泉。及時之雨。膏澤是宣。愈行愈健。彌勞彌堅。

人能畏真宰。妙慧卽在斯。聖誠宜篤行。能行始有知。

笑罵由他人。造次必於是。

君子固多難。恃主終致祥。

觀乎此。則主席信道之篤。體道之深。可見一斑矣。嗚呼。聞勝不驕。聞敗不餒。我國抗戰之勝利。良有以也。若秉此信念以建國。其亦安有不成者乎。古人云。多難興邦。殷憂啓聖。吾於中華有厚望焉。

朱主教序

余於抗戰期間。得讀吳子經熊所著仁愛學一書。精理名言。字字珠璣。竊歎吳子以吾教新進。而能淹貫經典。通徹玄微。一鳴驚人。是必無疑爲有道博學君子。低徊嚮往。數載於茲。今歲有幸。欣逢涇濱。積思之痼。一朝霍然。又承以聖詠譯義初稿見示。文筆古茂。音節鏗鏘。詠之爲詠。名副其實。則吳子於一鳴之後。又再鳴驚人矣。夫聖詠者。古稱難譯。而吳子之譯。游刃有餘。非究天人之學。曷克臻此。嘗考聖教典籍。其能維繫人心愛主之誠者。在古經中。首推「聖詠之集」。古教時期。古經「五紀」(生民紀。出走紀。肋未紀。數目紀。申命紀。)猶太人民。崇其來源。尊其事實。奉爲經典。稱爲典律。寶之重之。可謂至矣。然而聖詠之集。則猶太人民公祭私禱。皆爲應用之經文。故聖詠集之地位。乃一躍而與五紀並駕齊驅。不啻爲猶太人民之「五紀第二」焉。迨後基多降生救贖。新經問世。援典引古。於聖詠集。於依撒亞。所引獨多。(計新經援引聖詠集。凡五十五處。援引依撒亞。凡五十九處。)而聖詠集中諸多預言。句句應驗。耶穌基多降生救贖事蹟。尤爲公教初興時期廣播福音有力之宣傳。同時。集中聖詠。皆歷代古聖額禱上主之詞。情文並茂。至誠格天。尤爲千古絕唱。故羅馬公教用作頌禱。一如昔日古教時期。試觀聖保祿宗徒。恆勸信衆誦古聖詠。如曰。「爾等其用聖

詠。聖詩。聖歌。互相教益。互相勸勉。上憑聖寵潛孚默感。務在動作行爲中。歌頌天主。〔格羅森書。三。十六〕自是厥後。公教信衆。取爲通用經文。且經羅馬規定。以聖詠全集。編入修道士女每日念誦之大日課。務於一週之中。依次唱誦完畢。至於信衆普通念誦之聖母小日課。亦多採聖詠。增人熱心。由此觀之。聖詠之集。誠爲公教人士之『日用糧』。價值之重。爲何如乎。故今吳子之聖詠華譯。洵爲應時之作。既可供治聖經學者參考之用。又可使教中人士。於誦大小日課時。得以含英咀華。玩索精意。其有功於吾華聖教。豈小也哉。抑有聞吳子此譯。曾經

蔣委員長。駐節陪都。敵寇肆虐時期。親在防空洞中。三次校閱云。竊以

委員長當軍書旁午之秋。猶與教中人士。上下議論。汲汲以闡明聖道爲務。是則吾華聖教前途。必且大放光明。余雖老耄。尙當拭目俟之。民國三十五年九月一日。江蘇海門朱主教希孟序。時年七十有九。

凡例

一、「聖詠」即古經或舊約中之 Psalm。或譯「詩篇」。

一本譯所採聖詠次第。係依照希伯來原文。

一、聖詠多數有序。例如第六首序云。一此乃大維之詩。令樂官弦歌之。調用第八。是項序言。年代雖古。然不屬原詩。悉係後人所作。歷來經學家。對之頗有論爭。竊以此類序言。於我國讀者。無甚意義。概予刪去。於每首前另擬適合內容之標題。其序言中之有關重要者。則於附註中存之。

一、聖詠每首之分節。爲便利我國讀者起見。未予採用。

一本譯所稱「雅璋」意即造物主。通作「耶和華」。

一本譯所稱「樹德」。通作「猶太」。「義塞」通作「以色列」。

一本譯所稱「大維」。即爲 David。通作「大衛」或「大關」。

一本譯所稱「每瑟」。通作「摩西」。

一本譯所稱「西溫」。即爲 Zion。現行譯本或作「郇」或作「錫安」或作「西雍」。

一本譯所稱「柔瑟琳」。通作「耶路撒冷」。

- 一、本譯所稱「麗盆」通作「利巴嫩」。「迦鐵」通作「加低斯」。「塞門」通作「撒門」或「些泐孟」。「布倫」通作「西布倫」。「拿阜」通作「拿弗他利」。「諦羅」通作「推羅」。
- 一、其餘人名地名。多有因詩句關係而縮短或改易者。例如八十三首及百有五首。讀者如欲查究。可參閱通行譯本。

聖詠譯義初稿目錄

于總主教序

朱主教序

凡例

卷一

第一 君子與小人

第二 順與逆

第三 恃主無恐

第四 恃主常樂

第五 疾惡如讐

第六 懺悔吟之一 憂戚

聖詠譯義初稿 目錄

第七 被誣

第八 萬物之靈

第九 神與人

第十 問主

第十一 答客難

第十二 世風歎

第十三 夜如何其

第十四 視爾夢夢

第十五 忠厚廉潔

第十六 精神堡壘

第十七 无妄

第十八 凱旋賦

第十九 乾坤與妙法

第二十 預祝勝利

- 第二十一 勝利謝恩
- 第二十二 受天下之垢
- 第二十三 良牧
- 第二十四 迎駕
- 第二十五 安宅與正路
- 第二十六 表明心跡
- 第二十七 處困莫餒
- 第二十八 口蜜腹劍
- 第二十九 雷音
- 第三十 先悲後喜
- 第三十一 無窮之望
- 第三十二 懺悔吟之二承碑
- 第三十三 新歌一曲
- 第三十四 知味

第三十五 恩將仇報

第三十六 活泉

第三十七 老成人言

第三十八 懺悔吟之三 痛悔

第三十九 夢幻泡影

第四十 報恩之道

第四十一 病中吟

卷二

第四十二 渴慕

第四十三 眞光與妙諦

第四十四 今昔歎

第四十五 天作之合

第四十六 靈川與狂瀾

- 第四十七 大同
- 第四十八 保境安民
- 第四十九 潤身與潤屋
- 第五十 德行與祭祀
- 第五十一 懺悔吟之四 自新
- 第五十二 恃主與恃富
- 第五十三 愚者之言
- 第五十四 不義自斃
- 第五十五 翻雲覆雨
- 第五十六 落魄之淚
- 第五十七 時艱
- 第五十八 無日高高在上
- 第五十九 羣犬之狂吠
- 第六十 神助與人助

第六十一 高山仰止

第六十二 天平

第六十三 明發不寐

第六十四 天網恢恢

第六十五 甘雨

第六十六 如銀在鏡

第六十七 豐年謝恩

第六十八 以正克邪

第六十九 孤憤

第七十 虧益益謙

第七十一 否極望泰

第七十二 六合同風

卷三

- 第七十三 騷人好好勞人草草
第七十四 伊於胡底
第七十五 黜陟幽明
第七十六 天心厭亂
第七十七 念舊恩
第七十八 先民之頑梗
第七十九 民族之厄運
第八十 葡萄樹之被折
第八十一 存天理去人欲
第八十二 決獄務平
第八十三 反主同盟
第八十四 眷戀庭闈
第八十五 天人交歡
第八十六 仁淵義府

第八十七 念本

第八十八 處困籲主

第八十九 天主之盟

卷四

第九十 人生

第九十一 聖道保身

第九十二 庭植嘉樹

第九十三 王道與霸道

第九十四 聰明正直

第九十五 百神之君

第九十六 普天同慶

第九十七 佳音

第九十八 新曲

第九十九 篤實光輝

第一百 升堂

第百有一 親君子遠小人

第百有二 懺悔吟之五求恩

第百有三 慈父

第百有四 偉哉造物

第百有五 主恩罔極

第百有六 民之不淑

卷五

第百有七 入窮返本

第百有八 絃歌迎曉

第百有九 自作孽不可活

第百有十 君子道長

- 第一百十一 知與行
第一百十二 闕然口章
第一百十三 矜貧恤寡
第一百十四 解放歌
第一百十五 眞宰與偶像
第一百十六 報主願
第一百十七 仁與誠
第一百十八 進行曲
第一百十九 道學津梁
第一百二十 不可與處
第一百二十一 慈愛之主
第一百二十二 同心之言
第一百二十三 延頸企踵
第一百二十四 烏脫樊籠

- 第二百二十五 代虐以寬
第二百二十六 耕耘與收穫
第二百二十七 心廣體泰
第二百二十八 善人福報
第二百二十九 屋巔草
第三百十 懺悔吟之六守夜
第三百十一 天真
第三百十二 結約之櫃
第三百十三 和樂且湛
第三百十四 昏定
第三百十五 造物與受物
第三百十六 敘德辭
第三百十七 憶昔
第三百十八 道與名

第三百三十九 主之全知

第三百四十 因果

第三百四十一 擇交

第三百四十二 聖道中自有乾坤

第三百四十三 懺悔吟之七望曙

第三百四十四 新秩序

第三百四十五 光天化日

第三百四十六 主之全仁

第三百四十七 大地回春

第三百四十八 鈞天廣樂

第三百四十九 暢行宿命

第三百五十 大小和鳴

附註

參考書

聖詠 卷一

第一首 君子與小人

長樂惟君子。爲善百祥集。莫偕無道行。恥與羣小立。避彼輕慢徒。不屑與同席。優游聖道中。涵泳徹朝夕。譬如溪畔樹。及時結嘉實。歲寒葉不枯。條鬯靡有極。

惡人徒狡黠。飄飄如糠屑。悠悠逐風轉。何處是歸結。惡貫既滿盈。天人共棄絕。我主識善人。無道終滅裂。

第二首 順與逆

何列邦之擾攘兮。何萬民之猖狂。世曾蠱起兮。跋扈飛揚。共圖背叛天主。又云受命之王。曰上帝。豈長甘羈絆兮。盍解其縛而脫其纒。

在天者必大笑兮。笑蜉蝣之不知自量。終必勃然而怒兮。以懲當車之螳螂。主曰吾已立君於西溫。聖山之上兮。君曰吾將宣聖旨於萬方。主曾告予兮。爾爲予新得之元良。予必應爾所求兮。如聲斯響。普天率土兮。莫非吾兒之宇疆。爾當執鐵杖以粉碎羣逆兮。有如瓦缶與壺觴。

嗚呼世之侯王兮。盍不及早省悟。嗚呼世之法吏兮。盍不自守法度。小心翼翼以事主兮。寓歡樂於

敬懼。心悅誠服以順命兮。免天帝之震怒。何苦自取滅亡兮。自絕於康莊之大路。須知惟有委順兮。能邀無窮之福祚。

第三首 恃主無恐

主乎主乎。吾敵何多。耀武揚威。向我操戈。曰彼無神助。其如予何。

主作我盾。護我周圍。主爲我光。令我揚眉。竭聲籲主。罄達靈帷。

寤寐思服。主恩罔極。雖在重圍。何所用懼。

主乎救我。俯聽悲嗟。旣批敵頰。又折其牙。鮮民何恃。主德無涯。

第四首 恃主常樂

呼籲公明主。爲我伸冤屈。昔曾出我厄。令我得安逸。今者復求主。垂憐申舊德。嗚呼濁世子。何時知

曲直。狂妄安能逞。豈無黑與白。須知主公明。忠良是所秩。我求主必應。何苦自作孽。清夜常捫心。一

省順與逆。應獻忠誠祭。順命斯無失。

衆庶喁喁望。何日見時康。吾心惟仰主。願見主容光。主已將天樂。貯我腔子裏。人情樂豐年。有酒多

且旨。豐年誠足樂。美酒豈無味。未若我心中。一團歡愉意。心曠神亦怡。登榻卽成寐。問君何能爾。恃

主而已矣。

第五首 疾惡如讎

雅瑋吾主宰。傾耳聽我禱。鑒我默默情。聆我哀哀號。明發卽懷主。晨省豈不早。无妄惟眞宰。懷仁以爲寶。正邪不同居。善惡不同道。惟善故疾惡。痛絕諸兇暴。羣小在主前。焉能長自保。

我欲入主室。暢活主營澤。爰具敬畏心。朝拜爾聖宅。求主保我身。莫爲敵所得。平易爾道路。扶我庶無蹶。敵人何狡猾。出言無誠實。邪惡寒肺腑。心毒口則蜜。咽喉如荒墳。下埋朽腐骨。望主賜懲罰。貶譎諸叛逆。欲使衆醜類。自墜陷人窟。庶幾賴主者。望風咸相悅。揚眉而吐氣。歡聲頌帝力。愛戴聖名者。托庇享安逸。願主納善人。雍容侍爾側。

第六首 懺悔吟之一 憂戚

求主勿怒譴。求主息雷霆。垂憐茲荏弱。康復此殘形。我骨慄慄戰。我心惴惴驚。長跪問我主。何時救伶仃。祈主一顧盼。援手昭慈仁。死域誰念主。頌聲絕幽冥。心魂困欲絕。徒此長呻吟。夜夜暗流淚。牀褥淅秋霖。目枯因愁多。骨消緣辱頻。傳語作孽者。無復纏我身。我泣主已聞。我求主已聽。有禱必見納。有感豈無應。行見彼醜類。望風皆逡巡。

第七首 被誣

雅瑋吾天主。賴爾得平安。仇人肆誣讒。無風起波瀾。求主速營救。莫使我被害。彼人兇如獅。吞我心

方快。除主復何恃。不救吾其殆。倘吾曾爲此。有罪在雙腕。苟以怨報德。未以德報怨。任憑彼凌虐。雖死亦無憾。身敗不足論。名裂固所願。我實未爲此。請主奮身起。爲我抗衆敵。莫容橫逆熾。願主作裁判。高坐爾王位。衆民亦會集。環立爾周圍。但願睿哲主。鑒察我忠義。按照爾公平。報答我純粹。欲使惡人懼。不敢行無禮。欲使義人喜。沛然自奮勵。我主固全知。洞悉人肺腑。

主是護身盾。永保正直人。天威何顯赫。裁判公且明。磨刀霍霍箭在弦。人不回頭將受刑。兵戈火箭莫不備。誰能不畏主之噴。惡人如妊婦。臨岸時在卽。所懷惟禍胎。所產乃妖孽。心勞信日拙。自墜陷人窟。悖出亦悖入。自中毒人螫。出爾竟反爾。自傷投人石。報應何昭著。絲毫無爽忒。欲頌公平主。欲揚至尊德。

第八首 萬物之靈

我主在天上。聖名天下揚。諸天現光彩。妙手運陰陽。卻從赤子口。認出救世王。童蒙識玄機。靈證微而臧。直使諸悖逆。不得再鼓簧。

靜觀宇宙內。氣象何輝煌。瑞景燦中天。星月耀靈光。巨細莫不備。條理益彰彰。人類處其中。碌碌無所長。乃蒙主拔擢。聖眷迥異常。使爲萬物靈。天神相頡頏。皆自土中生。冠冕獨堂堂。萬物供驅使。取之如探囊。空中有飛鳥。地上有牛羊。尚有魚鱗族。優游水中央。悉歸人掌管。樂此無盡藏。飲水須思

源。殊恩豈可忘。但願大地上。聖名萬古芳。

第九首 神與人

我欲一心頌雅璋。縷述真神一切妙。歡忭鼓舞主懷中。心歌腹詠至尊號。吾敵已潰退。紛紛仆主前。公義已見伸。容斷洵無愆。主已懲萬邦。消滅諸悖逆。塗抹不肖名。終古歸沈寂。敵國城邑已荒蕪。樓臺亭閣悉成墟。繁華事散逐輕塵。欲尋遺跡蕩無存。恆存惟有天主國。雅璋皇座永不移。審判世界與萬民。聰明正直豈有私。困苦無告蒙哀矜。主是窮民避難城。又爲聖徒之保障。何曾孤負有心人。西溫居民當絃歌。暢向億兆宣神蹟。無辜之血主常恤。冤屈之人必得直。

雅璋憐我苦。拯吾出兇門。我在西溫門前立。中心感主發頌聲。

敵人掘罪自陷身。敵人布網自絆足。雅璋靈厲實昭著。陰謀詭計徒自辱。世上忘主衆不肖。終須相將沈幽冥。窮人豈能長被遺。鮮民之望終有成。寧容人類勝真宰。願主興起鞫頑民。務使世間傲慢子。自知僅屬血氣倫。

第十首 問主

我問主兮何故。邈然逝兮不我顧。時艱難兮困苦。主自隱兮何處。惡人橫行兮無度。窮人被逼兮無路。設詭計兮逞狂圖。欺孤寡兮陷無辜。驕矜自慢兮。目無主宰。劫奪人財兮。逍遙法外。飛揚跋扈兮。

心誇大。謂天主兮安足怕。中心兮自付。天主兮何存。某業兮穩固。千秋兮不淪。坐井而觀天兮。夫焉知吾主之經綸。恃勢凌人兮。自謂安如磐石。永享康寧。彼之口中兮。惟有欺詐。與呪詛。彼之舌底兮。滿貯螫毒。與邪污。埋伏窮鄉。殺人僻巷。眈眈虎視。窮民遭殃。驅無辜兮入網。謂天主兮健忘。既揜顏兮不見。我隱惡兮奚彰。我向主兮發哀歎。舉爾手兮濟衆難。莫容惡人兮誣神明。謂天主兮其不靈。詎知吾主兮早見。報應兮如電。窮苦兮無告。惟主兮是靠。孤兒兮無父。惟主兮是怙。求主痛擊羣姦兮。折其臂膀。窮究妖孽兮。降以淪喪。惟我天主兮。永古爲王。與主爲敵兮。靡有不亡。主已垂聽兮。謙者之音。必賜慰藉兮。堅固其心。伸彼冤屈兮。保彼覺獨。莫令凡人兮。擅作威福。

第十一首 答客難

友人勸我學飛鳥。飛入深山避災殃。君不見羣小彎弓箭在絃。欲於暗中射賢良。國家根基已崩潰。賢人焉能獨支撐。我答友人言。此語何荒唐。一生恃主得無恙。何必入山去自藏。雅瑋坐天廷。雙目炯炯察世人。賢良蒙鍛鍊。所以玉其成。惟彼兇與暴。乃爲主所憎。爲惡嬰天羅。雷霆作杯羹。爲善邀天眷。常得承歡欣。

第十二首 世風歎

仁義成絕響。忠信已泯沒。交友無誠意。口蜜心詭譎。求主矯浮薄。復使反撲拙。懲罰巧言者。剪截誇

誕舌。此輩炫利口。自謂世無敵。唇舌我自主。誰得相干涉。

雅璋聞此語。焉能長默默。已見弱者苦。已聞貧人泣。我今將興起。一慰長太息。務使貧與弱。各得其所適。至誠惟天主。聖道何純質。白銀經七煉。未能方其潔。主必濟窮民。莫隨斯世溺。惡逆如橫行。賢良無寧日。

第十三首 夜如何其

吁嗟天主兮。盍其有極。棄我如遺兮。慈顏恆匿。不見吾主兮。中心悒悒。黯然銷魂兮。將至何日。敵人高壓兮。何時得息。主其垂青兮。應我之求。賜光明於吾目兮。庶免昏睡而長休。豈可使彼敵人兮。幸吾災而樂吾憂。我之恃主兮。始末不渝。終必蒙救兮。賜以歡愉。我當謳歌兮。詠主德之特殊。

第十四首 視爾夢夢

愚人心中言。宇宙無主宰。此輩何卑污。所爲皆曖昧。欲求爲善者。不見一人在。主自九天上。俯首察生靈。儻有智慧子。願與主相親。紛紛落歧途。溷濁同垢塵。悠悠寰海內。竟無一賢人。豈其作惡者。莫具纖屑知。何以不懷主。視然食民脂。主與德爲鄰。惡人惴惴恐。平生悔貧人。貧人主所寵。

義寒之救恩。宜自西溫出。主必引衆俘。歸還其本宅。義寒與雅谷。歡樂將何極。

第十五首 忠厚廉潔

誰堪留帝所。誰堪居靈山。其惟行善者。心口無欺謾。既無譏人舌。又無惡心肝。處世惟忠厚。克己待人寬。見惡避若浼。見善共相歡。一言九鼎重。得失非所患。不將重利剝。不作貪污官。行善邀福澤。長如磐石安。

第十六首 精神堡壘

主乃我所依。一生安且怡。吾心白吾主。所天惟有汝。方寸無他好。懷主以爲寶。城中諸聖人。亦是我所親。同游聖教中。其樂何融融。

歸依邪魔者。愁上添添憂。祭祀含血腥。厥名亦可羞。

主是我基業。主是我歡杯。杯中酒常滿。家業永不衰。優游田園中。俯仰稱心意。日涉漸成趣。樂斯境界美。

爲我開明悟。主恩豈不富。夙夜無敢荒。惟恐忝大父。大父常在眼。但期無失步。兢兢如臨深。幸有主佑扶。持此寬心神。魂安魄亦舒。所望保吾魂。莫使淪幽冥。更望聖者身。免染朽腐痕。指我生命路。飲我瞻仰欣。吾主之右手。永爲福樂源。

第十七首 无妄

求主矜憫。直聽我聲。聲訴我言。無飾。但將赤誠吐。願主鑒中情。願主持公平。主曾賜鍛鍊。清夜測吾心。考驗亦云詳。未發纖屑妄。凡我口所言。莫非心所想。我既抱精一。心口豈有兩。耿耿懷主訓。習俗非所向。驕人行殘暴。何曾敢倣倣。兢兢履主道。未嘗循邪枉。

何爲此絮絮。知主必聽之。還祈傾爾耳。俾得畢其詞。急難求主佑。吾主未嘗辭。我今復求主。援手昭仁慈。願主保小子。如保日中暉。辨我於翼下。雍雍爾懷中。既無羣小慍。又免敵圍攻。

兇敵與羣小。麻木無惻隱。驕矜而自慢。相逼何太甚。眈眈如餓虎。其勢不可遏。又如彼伏獅。穴中覷遇客。

懇切求恩主。興起戮妖孽。用爾干與戈。救我脫橫逆。更望賜提撕。俾與鄉愿隔。鄉愿生斯世。但爲斯世活。以主無盡藏。暢恣其口腹。金玉既滿堂。有子萬事足。積蓄遺兒孫。繩繩相承續。吾志異乎是。所求非世祿。清白歸我主。常享承顏樂。當吾甦醒日。見主便是福。

第十八首 凱旋賦

中心愛主兮。我生命之源泉。主乃我之磐石與保障兮。亦爲我之恩保與所天。藏身之窟兮。禦敵之干。仰岑樓之崔嵬兮。視兵革而彌堅。悲我身之遭厄兮。求恩主之矜憐。竟脫我於虎口兮。信慈悲之無邊。

殺氣氤氳兮纏身。狂濤汜濫兮驚魂。幽冥之索綯重重。死地之羅網紛紛。身陷艱險兮求主。竭聲向主兮呼籲。主聞吾音兮宮中。哀聲上達兮宸聰。

主發怒兮乾坤震。大地顛兮衆岳崩。鼻騰烟兮口噴火。沙石爍兮草木焚。天幕下垂兮主親降。足踏陰霾兮雲茫茫。駕神駒而馳騁。鼓風翼而翱翔。披重昏以爲幔兮。假豎鬚而爲宮。陰陽相薄而成雹兮。絳烟起於雲中。顯至尊之赫赫兮。震天怒之隆隆。於是噓氣叱咤。冰炭俱落。火箭四射。敵人傾覆。地基暴露。江海成陸。主乃引手而相援兮。濟吾身於狂流。脫我於頑敵兮。救我於凶仇。固知吾主之聖心兮。恆抑強而扶柔。我旣惟主是怙兮。敵雖衆而何憂。夫其解我之倒懸兮。爲愛我之故。備承温燠兮。所以恤我之無辜。心地光明兮手潔。遵主之道兮翼翼。未入歧途兮居安宅。恆懷慈訓兮無愆忒。樂心跡之雙清兮。慎聖目之所視。感吾主之相酬兮。實無微而不至。

盛矣哉。雅瑋之爲德也。以仁報仁。以直報直。以正報正。而以逆報逆。蓋謙者必蒙升。而驕者必見抑。惟主一燃吾心之燈兮。而啓吾目之矇。雖三軍之當前兮。吾亦有所恃而無恐。旣有主爲之扶翼兮。應能超踰敵人之城壘。主道純兮主言粹。能倚主兮身無危。微雅瑋兮誰主。微天主兮何怙。主充我兮以力。使吾路兮安固。健吾步兮如鹿。植吾身兮高處。教吾手兮能戰。強吾臂兮能射。賜我以衛身之盾。佑我以聖手之力。沐我以仁。浴我以澤。滋茂條暢。實憑主德。所履恢恢兮其有餘。腳踏實地兮

而無蹶。追逐敵蹤兮。彼其潰。不予殄滅兮。誓不歸。紛紛負傷兮。倒於地。僵臥足下兮。不復起。嗟夫吾之能戰兮。非吾之力也。克服衆仇兮。仗主之德也。敵人狼狽兮。逃竄。仇人就戮兮。無數。呼人人不應。顛主主不顧。被我痛擊而粉碎兮。如飄風之揚灰。被我委棄於道旁兮。如糞壤之成堆。

主既救我於衆民之背叛兮。又立我爲萬國之君。作新民以事我兮。且非我素識之人。蓋惟同聲而相應兮。聞吾道而祇遵。苟中情其悅服兮。雖異族而猶親。彼必泯其町畦而去其圭角兮。兢兢然棄其險固而來賓。

頌曰。欽哉雅璋。願爾萬歲。紆貴屈尊。作我藩衛。銘心鏤骨。永懷慈惠。相我撥亂。安撫庶類。脫我於凶逆。拯我於暴戾。保我於萬死。登我於大位。敢不揄揚。布芳於世。敢不歌咏。宣主之美。主賜凱旋。於彼之王。主以膏澤。被彼元良。寵祐大維。綏以寧康。來胤後嗣。榮祚無疆。

第十九首 乾坤與妙法

乾坤揭主榮。碧穹布化工。朝朝宣宏旨。夜夜傳微衷。默默無一語。教在不言中。周行遍大地。妙音送長風。

晨曦發帝鄉。丰采似玉郎。洋洋溢喜氣。逍遙出洞房。天行一何健。六合任翱翔。普照無私曲。萬物被其光。

妙法洵全美。我魂得歸依。靈證洵萬確。童蒙識玄機。玉律豈有瑕。祇守心自怡。聖典何皎潔。悅目驚新奇。天威分明在。萬古永不移。神斷剖黑白。陰陽定是非。價值邁金石。滋味勝蜜飴。小子知趨避。福祿盡在茲。誰能悟其愆。惟主濯其疵。但願遠罪戾。庶免染塵縑。或可無大過。心口莫睽違。我是遊蕩子。願父贖我歸。永不離膝下。朝暮相追隨。

第二十首 預祝勝利

惟願主雅璋。眷爾患難中。惟願雅谷主。聖名保爾躬。願主自聖殿。錫爾恩寵隆。願主自聖山。錫爾福履充。念爾禮祀勤。悅爾燔祭豐。心願悉獲償。謀爲皆成功。行見爾凱旋。萬民喜氣沖。會當樹長旌。共慶主名崇。願主成爾志。使爾樂融融。固知受命王。酣暢主春風。主在諸天上。安然居九重。援爾以右手。帝力寧有窮。徒誇車馬力。敵人何夢夢。吾人恃主名。不與彼人同。彼皆仆在地。我立猶挺胸。惟願主雅璋。保王徹始終。聽我此日禱。盼我區區衷。

第二十一首 勝利謝恩

仰賴主大德。吾土喜氣沖。荷恩樂無極。陶然醉春風。心願悉已償。所求靡不從。先意介景福。寵遇一何隆。更以純金冕。殷勤加其首。王求保其命。主錫無量壽。英名仗神助。光榮仰天佑。沐浴芳澤中。美德萃其躬。優游恩光下。天樂湧其衷。王惟主是怙。慈惠貫始終。行見我聖主。奮臂逐羣凶。羣凶懾主

威若處紅爐中。天威震霹靂。燒盡妖魘踪。斬草在除根。一掃謬種空。若輩懷叵測。對主施頑攻。奸圖焉能逞。分散如飄蓬。主必對衆逆。從容挽神弓。赫赫天地宰。稜威萬古同。吾人嘗引吭。高歌造化功。

第二十二首 受天下之垢

主兮主兮。胡爲棄我如遺。發呻吟於危急兮。何惠音之遲遲。朝籲主而不應兮。暮惆悵而無依。夫主固吾族之所口碑兮。精靈夙彪炳乎歌詩。稽先人之遐迹兮。孰不托聖澤而優游。但聞籲主而見拯兮。焉有倚主而蒙羞。譽予乃蚯蚓而非人兮。爲萬民所唾棄而受天下之垢。觀予者皆大施其嘲嗤兮。相與反其唇而搖其首。曰彼既托命於天主兮。應蒙天主之援手。苟爲天主之所寵兮。當見天主之營救。

信夫吾平生之所仰望兮。惟在天主之躬。主既出予於母胎兮。又教予仰聖恩於慈母之懷中。溯自予之有生兮。向承吾主之恩撫。卽予之尙在胎中兮。主亦未始非予之所怙。今大難已臨而援手無人兮。吾主寧能捐棄而不顧。

健牡紛紛兮。罔我周匝。來自已珊兮。洶洶相逼。猛如餓獅兮。張口欲食。體渙解兮。骨脫。心消融兮。如蠟。喉焦如礫兮。舌貼齦。身被委棄兮。轉溝壑。惡犬環縈兮。羣小蜂聚。手與足兮。洞穿。骨磷峋兮。可數。衆人旁觀兮。舉目而視予。分我外衣兮。鬪我內服。求主毋我遺棄兮。所恩佑之神速。保吾魂於刀

劍兮。脫吾命於狂畜。出我於獅口兮。拯我於兕角。會當宣聖名於諸弟兮。誦大德於會中。願凡虔敬之人兮。播揚仁風。願惟谷之苗裔兮。聖道是弘。願義塞之子孫兮。惟主是崇。惟天主之慈憫兮。樂拯厄而濟窮。信乎其有求而必應兮。何曾掩其天容。吾欲申讚歎於廣衆之中兮。還夙願於諸聖之前。上以報罔極之恩。下以踐平生之言。必使謙謙君子。飲和飽德。懷主之徒。絃歌不絕。心靈日健。永生不滅。行見普天率土兮。幡然憬悟而來歸。列國萬民兮。翕然致眷戀於庭闈。蓋主乃天地之宰兮。又爲萬國之君。世之豐席厚履者。固當飲水而思源兮。困苦瀕死者。亦應俯伏而投誠。曷哉吾魂。爲主而生。來胤後嗣。專主惟勤。世代緜緜。恭聆福音。父以傳子。子以傳孫。念念毋忘。主之經綸。

第二十三首 良牧

主乃我之牧。所需百無憂。令我草上憩。引我澤畔游。吾魂得復蘇。仁育一何周。更爲聖名故。率我正道由。雖經陰谷裏。主在我何愁。爾策與爾杖。實令我心休。譙我羣敵前。感爾恩施優。靈膏沐我首。玉爵盈欲流。慈惠共聖澤。長與我爲儔。行藏勿離主。此外更何求。

第二十四首 迎駕

率士之濱。莫匪爾屬。普天之下。莫匪爾僕。滄溟之上。肇建寰宇。狂瀾是鎮。中流砥柱。陟彼靈山。登彼聖域。誰堪當此。其惟純德。心跡雙清。無愧無怍。必承天休。必蒙恩贖。夙夜懷主。無忝

雅谷。

嗟爾諸城。轟爾重圍。嗟爾古戶。高爾閑閤。殷勤迎納。光榮之君。

榮君伊誰。全能雅璋。惟仁無敵。凱旋而歸。

嗟爾諸城。轟爾重圍。嗟爾古戶。高爾閑閤。殷勤迎納。光榮之君。

榮君伊誰。實維雅璋。萬有之主。煥焉其輝。

第二十五首 安宅與正路

心魂所仰望。惟在主雅璋。平生無他恃。莫教我蒙恥。勿使我仇人。向我誇優美。固知盼爾者。不致有所愧。惟彼奸詐徒。終須遭崩潰。

求主加指引。從容聖道裏。求主賜教誨。俾我明真理。爾乃我恩神。朝暮所佇俟。爾心存慈愛。振古已如此。忘我幼年過。宥我往日罪。求爾加眷顧。用昭爾慈惠。依爾好生德。領回遊蕩子。示彼何所歸。指彼何所履。佑彼謙誠者。克己而復禮。守盟樂道者。當爲主所喜。爲爾聖名故。寬免我罪戾。罪戾積如山。愧悔亦不已。

人能懷寅畏。必蒙主愛護。示爾以廣居。指爾以大路。大路從容行。廣居宴然住。愛屋應及鳥。後裔承此土。主與虔者親。啓迪道中趣。我日常仰主。賜我脫網罟。望主加哀矜。恤我惇獨苦。愁多心如結。權

難求主助。憐我狼狽狀。救我一切辜。求主保吾身。身爲衆怨府。莫令我承羞。主是安身處。鑒我一片誠。忠貞蘊臟腑。脫我於患難。莫孤我延佇。求主救義寒。脫離諸恐怖。

第二十六首 表明心跡

殷勤求我主。一伸我真愨。平生惟仰主。所守寧不篤。願主測中情。鍛鍊我心靈。慈恩常在目。聖道從容行。未伴妄人坐。未偕奸徒立。羣小會集處。何曾敢廁足。洗手滌餘穢。留連於闕幃。詠我感謝意。誦主玄妙蹟。心慕爾庭幃。榮光之所宅。莫將我靈魂。使與罪人雜。莫將我生命。與彼同消滅。若輩惡盈貫。受賄一何多。吾心愛清白。應與彼殊科。求主賜於全。俾居安樂窩。綽綽有餘裕。會中獻雅歌。

第二十七首 處困莫餒

主是我明德。何所用惕惕。主是我恩保。誰能褫我魄。惡逆徒洶洶。但見其傾軛。大軍雖當前。吾亦無備慄。中君旣安泰。威武焉能屈。

求主惟一事。足以慰幽衷。終身居主宅。陶然醉春風。逍遙聖殿裏。俯仰樂無窮。

我當患難日。必蒙巖其室。納我於幔角。置我於磐石。從此得揚眉。克服周圍敵。宜在聖壇上。獻祭表歡悅。引吭吟詩歌。頌美主大德。

望主聽我音。俞允昭矜憐。似聞良心語。爾當求主顏。主顏固常求。但望主莫揜。求主勿峻拒。令僕心

慘慘除主無生路。莫將我棄捐。父母縱相棄。知主必見涵。仇敵正洶洶。頗感行路難。求主加指導。引我入平坦。豈可容華逆。得我乃心甘。盍視彼鳥獸。對我長抨擊。妄證且咒詛。無所不用極。所幸未絕望。尙得自支撐。深信在。人世重得見春光。告爾氣無餒。仰主圖自強。何以養爾勇。惟有信與望。

第二十八首 口蜜腹劍

呼籲我恩保。莫向我作譬。爾若長默默。我將陷泥中。主盍一垂顧。鑒我耿耿忠。向主發哀聲。舉手朝聖宮。莫將我消滅。使與羣兇同。彼輩口如蜜。心中含辛螫。祈主按其行。報彼諸罪孽。自作應自受。處以所應得。目中無眞宰。藐視靈異蹟。既爲主所否。何由自建立。可讚惟雅瑋。已聞吾歎息。是我衛身干。是我生命力。一心惟賴主。賴主信有益。神樂湧心府。頌聲從中發。祈保受命王。萬民食帝力。拯救爾子民。福佑爾嗣業。長爲元元牧。涵育靡有極。

第二十九首 雷音

告爾天神。齊頌主德。聖名馥馥。稜威赫赫。肅雍拜主。被爾黼黻。主音淵淵。在水中央。惟主作雷。自彼湯湯。厥音隆隆。赫赫有響。厥音霹靂。折彼香柏。灑盆西連。躍躍如犢。轟雷旣行。電光閃爍。曠野聞音。戰戰慄慄。迎歲之野。斯惕斯懼。塵霧厥音。遄產幼鹿。愷彼森林。木葉盡脫。凡在殿中。莫不祝福。雅瑋御宇。溯自洪荒。振古如茲。王權無疆。福哉天民。恃主日強。戢爾干戈。永享安康。

第三十首 先悲後喜

心感雅璋。扶持小子。未令敵人。揚眉吐氣。曩者有患。呼籲於爾。爾應我求。吾病以治。肉我白骨。生我於死。蒙主煦育。可不頌美。曷哉諸聖。讚主莫已。聖怒一時。慈恩永世。長夜悲泣。拂曉乃喜。

昔處康樂。自謂安固。主爲磐石。寧用後顧。忽掩慈顏。心生憂怖。哀哀求主。聽我仰訴。小子之血。於主何補。倘轉溝壑。化爲塵土。塵土何知。寧能讚主。求主垂憐。加以神助。主聞吾禱。化泣爲舞。解我麻衣。披以歡緒。感銘靈府。焉能默默。稱謝洪恩。永世不息。

第三十一首 無窮之望

主乃我所恃。莫教我向隅。願主昭大信。營救莫躊躇。願主作磐石。俾我無憂虞。願主爲安宅。俾我得常居。既是我保障。且爲令名故。應賜我指引。脫我於網罟。敬將吾靈魂。托付於爾手。至誠惟吾主。已將我拯救。迷惑邪妄者。爲我所深惡。真神豈有他。我惟爾是枯。爾知我艱辛。爾識我心苦。雖苦亦自甘。悅懌爾仁恕。昔曾承主恩。綽綽有餘裕。何曾將吾身。委爲敵人俎。今日復罹難。求主申舊恩。鬱悒腸欲斷。憂苦日已昏。愁煎生意枯。悲嘆歲月新。精力日以衰。罪多氣消沈。蒙辱因敵衆。無顏見比鄰。相知競迴避。有如眼中釘。雖存已若亡。棄置如舊瓶。所聞惟讒謗。恐怖充塵氛。羣奸相聚議。欲害吾子身。伶仃惟恃主。惟主是吾神。禍福托主手。脫我於仇人。願爾開慈顏。照護爾微臣。莫令我缺望。應

使彼吞聲。惡計既受挫。默默歸幽冥。截彼誇誕舌。絨彼誑訛唇。庶幾傲慢子。不復誣精誠。樂哉諸君子。事主尊且親。主有無窮福。特爲爾貯存。肉眼未曾見。俗耳未曾聞。雍雍卵翼下。熙熙承煦溫。毒計無從害。譏舌不得侵。羣小見擯絕。爾爲入幕賓。偉哉造物主。待我恩何深。捍衛無不至。置我於堅城。情急方寸亂。遽出怨主聲。主實未棄我。心期蒙玉成。告爾諸虔信。愛主務加勤。忠貞承拔擢。駭暴被嚴懲。願凡恃主者。養勇壯其心。

第三十二首 懺悔吟之二 承前

其罪獲赦。其過見宥。樂哉斯人。主恩寬厚。主不見罪。真心痛悔。樂哉斯人。主恩似海。

我昔有罪。不肯自招。呻吟不輟。生趣日消。聖手所指。暮暮朝朝。夏日相逼。我體枯焦。我既自承。求主寬饒。誓言直告。罪痕斯銷。

傳語虔信。及時祈主。洪水不犯。主實砥柱。救爾於厄。脫爾於罟。轉泣爲歌。錫爾多祐。教爾小子。示爾以路。我目所視。毋失爾步。勿效拘羆。不甘馴御。載鞭載勒。斯知去處。哀哉不肖。自求撻楚。謙謙君子。惟主是怙。賢人懷主。方寸常寬。清明在躬。云何不歡。

第三十三首 新歌一曲

我告諸善人。歡躍主懷裏。頌聲出諸口。盡善且盡美。何以頌主德。鼓琴復鼓瑟。何以咏主榮。新歌奏一闋。彈者盡其藝。歌聲務和協。主言皆正直。主行皆篤實。所樂惟仁義。慈愛被八極。發號成諸天。噓氣生萬物。海水壺中貯。諸淵庫中集。衆生當畏主。宇宙亦震慄。主乃造化宰。萬有應聲出。列國與兆民。千算亦何益。何如主一算。萬古永不易。奉主之國必發達。承恩之民安且逸。主在天庭上。垂視衆生靈。主自聖宮中。俯察萬國民。既造人靈心。亦欲觀其行。君王兵雖多。不能必制勝。勇士力拔山。不能保其命。馬蕭蕭。車磷磷。窮兵黷武殃及身。神目所青睞。惟在虔敬人。一心望主者。必得沐甘霖。大難得不死。饑饉亦能生。一切無足恃。可恃惟真神。心愛主之道。仰賴主之名。察我耿耿望。賜我無窮恩。

第三十四首 知味

誦主願無間。美辭恆在唇。中心弘玄德。謙者必樂聞。我歌爾應和。相與崇真神。拯我出衆難。可不感洪恩。懷主斯常樂。睇面益於背。終身不承羞。俯仰無作愧。卽如此區區。備受主之惠。昔日處困厄。今日慶歡慰。寅畏邀主議。天神周身圍。願我衆兄弟。一嘗主之味。其味實無窮。親嘗始知美。

敬主邀天休。所需百無缺。壯獅有時飢。忠徒莫不適。願將敬主道。諄諄誨子姪。授爾立身法。傳爾壽康訣。謹守爾之舌。莠言慎毋說。謹守爾之唇。詭詐慎毋出。棄惡勉行善。和睦最可悅。主目所樂視。賢者之行實。主耳所樂聽。賢者之陳述。作惡激天怒。身死名亦滅。賢者求見應。處困不終日。傷心承溫煖。哀慟見矜恤。

君子固多難。特主終致祥。主必全其身。百骸渾無傷。惡人死於惡。仇善祇速亡。忠魂必見贖。托主終無殃。

第三十五首 恩將仇報

欸欸求恩主。奮起抗吾敵。吾敵恣侵略。求主施遠擊。執爾干與盾。操爾戈與戟。護我以恩佑。阻彼以神力。明告我心魂。我爲爾安宅。挫折諸險巖。擊潰衆凶賊。天兵加追逐。如風飄積屑。使其所由徑。澹多蹟石。若輩何險毒。無故加橫逆。設罅且張網。欲圖我隕越。願其遭報應。身受所作孽。自陷羅網中。葬身所掘窟。令我藉主恩。中心自怡悅。主恩實無邊。銘心且鏤骨。誰似主雅瑜。抑強而扶弱。窮苦無告者。特主得蘇息。

羣小紛紛起。醜白以爲黑。無風興波瀾。以怨報我德。被誣將誰訴。中心痛欲絕。曩者彼有患。吾心爲惻惻。衣麻且齋戒。求主脫其厄。所求出至誠。對主披心腹。待之如良友。愛之如骨肉。直如居母喪。心

魂慘不樂。一朝我罹難。欣然相慶祝。落井更投石。心中懷叵測。相逼日以甚。欲將我撕裂。切齒爲何因。醉酒且飽德。此情主應見。寧能長默默。祈速保吾命。莫爲羣獅食。會當在衆前。宣揚主恩澤。莫令昧良者。欣然看我蹶。無故樂我禍。眉目傳悅懌。所議非和平。所懷惟詭譎。城中善良人。不得享安逸。見我遭顛沛。羣逆笑嚇嚇。吾目亦何幸。得覩此一日。奸情實昭著。吾主寧不察。祈主毋遐棄。一伸吾之直。發揚爾正義。無令終受屈。莫使彼羣小。洋洋喜氣溢。彈冠共相慶。竟將彼吞滅。務使幸災者。弄巧反成拙。但願正直人。歡呼開胸臆。大公惟雅瑋。忠良必蒙秩。盛德何日忘。頌聲上脣舌。

第三十六首 活泉

不肖之人性怙惡。赫赫天主不在目。自媚自銜真宰前。意謂隱私誰能燭。言語惟有誑與詐。行爲無存知與仁。臥而思惡起而行。羞惡之心早淪泯。

主之慈愛沖諸天。主之信義薄雲間。主之正直峻於嶽。主之容斷深於淵。人畜草木盡覆載。好生之德洵無邊。世人咸庇卵翼下。安居大宅飲肥鮮。主復飲以靈川水。在主身邊有活泉。吾人沐浴靈光內。眼見光明心怡然。願主常將大慈愛。普賜識主衆生靈。我心正直無私曲。願主長與我相親。莫令驕人來蹂躪。莫令羣逆來相凌。君不見作惡者。長已矣。橫尸徧野不復起。

第三十七首 老成人言

莫羨彼羣小。莫妬作惡人。蔓草終被芟。蕭艾豈常青。

恃主勉行善。恬然居廣宅。怡怡承甘旨。飲和且飽德。所求必見應。心願靡有缺。心事全託主。安排自妥帖。爾義必見彰。爾直必大白。遠近仰光輝。有如中天日。應向天主前。默默披心腹。莫因小人達。中心懷不服。此輩恃詭計。爾當恃貞慤。

消爾不平意。怒乃惡之媒。羣小豈能久。敬主長恢恢。瞬息彼將逝。欲尋無踪跡。善人承大地。心廣體亦適。

彼欲害賢良。相見恨切齒。天主必哂之。知其時已至。彼佩弓與刀。欲殺賢與良。刀必自刺心。弓必自穿腸。

善人縱清苦。猶勝惡人富。惡人必折肱。善人有主扶。

純德主所眷。基業永古存。臨難無惶懼。凶年飽且溫。

羣小自作孽。敢與主爲敵。天天復灼灼。一開卽凋落。茅草亂蓬蓬。一燒便成空。

惡人慣抵賴。善人樂布施。此爲主所福。彼乃主所棄。

主固善人步。喜其行中度。縱蹶不仆地。因有主翼輔。

昔幼今已老。老人閱世多。未見爲善者。終身歎慙軻。更未見其嗣。流落爲乞兒。生前積衆善。後代膺

繁社。

棄惡勉行善。永居爾安宅。天主愛正義。忠良不落魄。忠良常蒙寵。刻薄應無後。義者承其業。亦能長保守。

賢者口與舌。惟傳真與善。聖道縉心府。聖德從容踐。惡人覷賢者。心中懷叵測。主必保無辜。玉鑑照黑白。兢兢守主道。必蒙主提挈。賜爾承大地。親見衆逆滅。曾見惡勢張。愆翠如春林。旋復經其宅。蕭條不見人。應看仁義人。和平傳家久。惡逆無結果。殃身且絕後。主與善人鄰。有難必見臨。拯之羣逆手。報答忠貞心。

第三十八首 懺悔吟之三 痛悔

求主勿怒譴。求主息雷霆。神箭着微軀。靈威逼吾身。疚深形顛顛。罪多骨震驚。惡盈欲沒頂。孽重實難任。瘡痍已遍體。祇緣心不靈。哀痛度朝夕。自憐僂僂形。舉身無完膚。五內焦如焚。奄奄存一息。徒此長呻吟。丹忱主應見。欬歔主應聞。怒怒心如搏。悒悒氣消沈。疚心如疾首。愁蒸雙目昏。良朋袖手看。家人不敢觀。仇人仍設網。殺我方甘心。羣聚譏詭計。終日出惡聲。裝啞不之答。作聵不之聽。如啞

又如夢。委曲求和平。除主復何怙。有感寧無應。求主挫衆敵。免向我誇勝。戰戰如履薄。兢兢如臨深。願承平生罪。翼翼白小心。無故仇我者。羣集如青蠅。以怨報我德。求仁反見憎。祈主莫我棄。須臾勿離身。相援莫遲遲。惟主是恩神。

第三十九首 夢幻泡影

世路何崎嶇。小心斯無虞。莫令三寸舌。誤茲七尺軀。人前一啓齒。毀謗在須臾。因此守緘默。索然寡歡愉。

知音不可望。幽衷共誰賞。憂鬱塞心曲。孤憤炙中腸。

安能長默默。開口問上蒼。大限何日屆。壽數幾多長。人無百年好。花無百日香。浮生總是夢。彈指已云亡。又如彼泡影。何苦自迫遑。

金玉縱滿堂。後來知誰有。何如將一切。托付天主手。寄魂大化中。安然取不朽。願主拔我罪。永塞讒人口。豈敢怨顛沛。固知主所授。伏祈息聖怒。勿再加杖毆。吾主施訶譴。孰能不消瘦。含淚籲恩主。渴望主眷佑。在世如作客。作客豈能久。平生罪孽多。惟求主寬宥。死前當自新。蕩滌一身垢。

第四十首 報恩之道

小子所仰望。惟在聖主躬。主已應我求。呼籲達宸聰。拯我於深壑。拔我於泥中。置我磐石上。安步且

從容。

吾主將新曲。置諸我舌端。洪恩寧可忘。美德當讚歎。令人發深省。幡然慕聖德。相率脫歧路。怡然歸安宅。痛絕邪妄徒。莫交傲慢客。

主待我何厚。恩德多且奇。聖蹟日日新。浩蕩誰與比。我欲咏大德。大德超言詞。

祭祀興燔牲。非主之所喜。所喜惟耳順。翼翼承甘旨。願將爾天書。藏我膝子裏。亦欲向大會。宣布爾佳音。諄諄何曾倦。惟主知我心。仁義寧容匿。當詔天下人。我願向廣衆。傳爾善與真。莫棄爾仁淵源。源賜洪恩。但願爾聖道。長作我明燈。

禍患圍我身。罪孽實不輕。忽尤多於髮。心灰目不明。求爾賜救拔。臨格莫遲遲。移使謀我者。無所施其伎。今雖笑呵呵。來日問奈何。

願凡懷主者。雍雍主懷中。願凡愛主者。常貽主光榮。必蒙主眷顧。君子豈終窮。主乃我恩保。速來濟吾躬。

第四十一首 病中吟

眷顧貧苦。主必賜福。身罹患難。春回黍谷。主必相之。翼而長之。優游一世。潤之昌之。敵人欲害。保之障之。呻吟病榻。扶之掖之。展轉不寧。康之復之。

敢告天主。我罪實多。求主垂憐。逐此病魔。不聞敵人。大施譴訶。願彼過死。厥名消磨。甘言慰問。惟証
惟証。當面賊賊。轉背呵呵。

幸災樂禍。納粉私議。炳入管旨。彼也不起。斯何人哉。素所親暱。曾食我粟。醉酒飽德。竟亦懷貳。落井
投石。

主其垂憐。令我康復。容我再起。報彼衆惡。和我克敵。用昭爾寵。恕我無辜。賜我扶掖。俾立主前。不被
搖動。

可頌惟主。養衆之神。千秋萬歲。德威日新。

聖詠 卷二

第四十二首 渴慕

予心之戀主兮。如糜肥之戀清泉。渴望永生之源兮。何日得重覩天顏。人問爾主安在兮。朝暮涕淚漣漣。以涕淚爲飲食兮。吾主盡亦垂憐。憶昔領導羣衆兮。同登聖所。舉國狂歡兮。如享佳節之大醮。撫今思昔兮。予心鬱悒以悲苦。

予嗟予心胡爲乎鬱悒以悲苦兮。蓋不委心於天帝。望天帝之莞爾兮。若久雨之新霽。

思望吾主兮。髮心欽欽。流離乎約旦之外兮。徘徊乎黑門之嶺。聆瀑布之喧騰兮。淵與淵其相應。一波未平而一波又起兮。傷夫洪濤之沒頂。追念昔日兮。慈恩何富。朝承主之恩澤兮。暮扞予之仰慕。素爲予之磐石兮。今胡爲棄我如遺。豈不見予之轆軻兮。豈不聞敵人之嘲嗤。頻問爾主安在兮。予心胡云不悲。

予嗟予心胡爲乎鬱悒以悲苦兮。蓋不委心於天帝。望天帝之莞爾兮。若久雨之新霽。

第四十三首 眞光與妙諦

何羣逆之詭譎兮。惟殘害之爲務。求主一測予之中情兮。吾固不與彼同度。主其伸予之冤兮。辨予

之誣。乘爲予之磐石兮。今胡爲棄我如遺。豈不見橫逆之類加兮。豈不聞小子之歔歔。盍發爾之眞光與妙諦兮。俾有所依。引予至爾之靈丘兮。接予入爾之幔帷。使盤桓於聖境兮。養吾心之怡怡。將撫琴以歌詠兮。樂陽春之熙熙。

予嗟予心胡爲乎鬱悒以悲苦兮。盍不委心於天帝。望天帝之莞爾兮。若久雨之新霽。

第四十四首 今昔歎

吾主古時恩。先輩遞相述。吾儕耳所聞。聖蹟何烈烈。親手逐諸夷。吾族蒙建立。諸夷皆衰落。吾族獨發達。列祖克斯士。非仗刀與戟。敵國望風靡。制勝豈以力。惟恃主手臂。及主歡顏色。主乃吾族王。請佑我雅谷。吾欲托主恩。掃蕩彼頑敵。吾欲奉主名。肅清彼衆逆。弓刀安足恃。惟主能救厄。與我爲敵者。終必見傾蹶。會當詠大德。永感主之德。

主今竟離我。令我受挫抑。乘我信如遺。不復相我卒。一見敵人來。紛紛皆竄逸。容彼殘忍賊。恣意肆劫奪。我如待宰羊。流離在異域。主果憐子民。實未受其值。豈我義舉人。卑賤不如物。見辱於鄰邦。貽笑於異國。冷嘲與熱罵。令我心如結。此辱常蒙首。此恥常在目。所聞惟惡言。所見惟凌虐。哀哉我鮮民。胡爲遭此厄。吾人未忘主。謹守主之約。吾心何曾忒。遵命何曾忒。奚爲降異災。使爲野犬食。死蔭重重垂。令我不得活。我苟忘眞神。而爲異神役。主知心中事。焉能不發覺。正惟爲主故。吾人日見戮。

見戮何易易。直如羔與犢。

興矣吾恩主。奚爲尙睡着。興矣毋永棄。我將淪死谷。奚爲掙爾顏。不見我傾覆。吾命逐塵埃。吾身轉溝壑。祈按爾仁慈。奮起救吾族。

第四十五首 天作之合

美辭湧心府。作頌頌吾王。舌如書家筆。瞬息卽成章。玉儀邁衆庶。齒頰盈芬芳。因得主眷顧。錫福永無疆。

吾願大能者。腰劍燦戎裝。光耀與威嚴。煜煜森劍鋒。正直且謙和。篤實生輝光。赫然驅車出。所向誰能當。右手施奇蹟。散亂如探囊。爾箭何鋒利。射敵敵皆僵。猶歎救世主。皇圖永熾昌。國權惟正直。扶弱而抑強。罪惡爾所厭。仁義爾所張。天主美爾德。霄澤迴殊常。爾衣世希有。馥郁發衆香。安居象牙宮。天樂聲鏗鏘。赫奕衆女中。有女出天潢。王后佩金節。亭亭玉座傍。娟娟彼姝子。諦聽且思量。爾民與爾家。爾宜長相忘。王慕爾麗容。王爲爾乾綱。小心事夫子。夙夜莫敢違。詠羅諸淑女。嘉獻會成行。詠羅諸富人。咸求爾包荒。王女在宮中。榮華無與方。金線耀朝日。錦衣而繡裳。招展來王前。環珮鏘琳琅。衆腰隨其後。諸嬖亦相將。歡欣溢眉宇。踴躍入宮牆。爾子與爾孫。將紹祖令望。皆得踐王位。分封暨八荒。芳名被萬世。生靈長稱揚。

第四十六首 靈川與狂瀾

主爲吾人所依恃。大難臨頭可托庇。縱使地崩山墜海。洪濤洶湧衆嶽駭。神助在咫尺。方寸無震盪。一川溶溶媚帝城。中間坐鎮至高神。主之安宅誰能動。恩澤騰沸在清晨。萬民擾攘列邦亂。天主發音大地顛。萬有之宰相吾儕。雅谷之主與吾儕。

雅瑋德業何輝煌。傳語世人來觀光。普天昇平戰氛息。干戈銷毀弓箭折。無限戰車付一炬。安居樂業毋自擾。我是天主爾應知。願爲爾君作爾表。

萬有之宰相吾儕。雅谷之主與吾儕。

第四十七首 大同

告爾萬民。齊鳴爾掌。向主誼愉。抒爾景仰。維彼至尊。威靈顯赫。維彼天主。統御八極。撫綏黎元。協和兆域。更爲吾族。保定基業。以光雅谷。以昭慈臆。

庶類歡騰。慶主之升。允宜吹角。響徹天雲。普天率土。頌美吾君。血氣之屬。莫匪王臣。整爾雅曲。潤爾歌音。主曰寶座。監臨下民。百王歸附。集主之廷。世之屏翰。統於一尊。浩浩蕩蕩。莫之與京。

第四十八首 保境安民

雅瑋在靈山。於程無與比。邑民承主恩。頌美永不已。西溫何嫺嫺。秀氣甲人寰。聖邑在其中。北有雙

翠巒主居聖宮裏。生靈所托庇。鐘者衆敵會。會師窺吾地。望見瑟瑟琳城。心中發昏憤。手足無所措。倉皇抱頭退。恐怖寒臟腑。苦痛如產婦。又如海上舟。颶風捲之去。昔日所耳聞。今日得目覩。樂哉斯京畿。真宰所眷顧。既爲主所植。萬世安以固。

我在聖堂中。向主披丹臆。願將爾聖名。傳之於八極。聖名之所至。頌聲亦洋溢。主之大手臂。舉措皆正直。願爾西溫山。樹德濟城邑。感佩主容斷。望風坐相悅。苟謂予不信。西溫一遊歷。檢點彼成樓。周覽彼城闕。細察彼宮殿。何一有毀缺。允宜向後世。盛傳主大德。主乃我恩保。芳澤永不絕。

第四十九首 潤身與潤屋

萬民其注意。世人宜傾耳。不問貧與富。無間賤與貴。悉心聽吾言。吾言具真慧。平生涵玄默。心與大道契。低首聆微言。撫琴詠妙理。橫逆縱類仍。心泰何憂否。財富安足恃。不得贖昆弟。黃金高北斗。未足賂天帝。生命無價寶。非財所能市。永生與不朽。人力寧能致。爾其勿妄想。妄想祇多事。智巧徒爾爲。終須有一死。愚益不足論。自當紛紛逝。身亡留其財。他人爲之嗣。意謂某業因。第宅保萬世。孳孳求田舍。瑣瑣標名字。誰知位難持。榮華荏苒已。生榮死則休。蠢蠢如鹿豕。冥頑何足訓。世人反稱智。實如待宰羊。死亡爲之牧。平明正人興。羣小嘗俯伏。塵影淪重泉。何處可托足。主必贖吾魂。安然脫冥獄。脫獄將何適。納入主靈轡。

富人不足畏。但能潤其屋。潤屋亦何益。空手歸寂寞。一生圖安樂。人謂善求福。光陰容易度。彈指入昭穆。杳杳卽長暮。光明誰復曠。貴人不悟道。何以異六畜。

第五十首 德行與祭祀

全能主雅璋。行詔徧八極。東白日所出。西至日所入。西風總淑氣。吾主所悅懌。主自聖宅中。靈光照萬國。大主行巡狩。聲威何赫奕。霹靂爲前驅。大風舞前車。揚聲告天地。吾將鞠寰域。傳語獻祭者。與我有成約。俎之與我宜。宣布我玄牝。臬司主親任。容斷惟正直。告爾義塞民。吾乃爾之神。靈鑒莫不察。知爾祭祀勤。馬牲無瑕疵。居常聞芬馨。茲欲爾知者。此事非所欣。豈貪爾太平。豈羨爾羔羊。林間之百獸。皆屬大地奴。千山與萬壑。爲我遊牧場。山上之飛翮。野中之毛族。宇宙與萬物。何者非吾屬。吾若患饑渴。寧就爾取足。奚用飲羊血。奚用饜牛膾。懷恩是真祭。篤行爾所諾。救爾出苦難。賜爾贊化育。

主謂作惡者。何事研玉律。口頭誦盟約。心中存乖逆。吾言如充耳。不復懷大法。盜賊爲同黨。奸非是所狎。出口惟誇言。行詐憑長舌。骨肉反不親。中傷盡有極。爾罪參在上。吾暫守緘默。遂謂吾無見。與爾爲同德。誰知時已屆。將降爾顯罰。罪孽彰在目。何由道爾責。嗟爾忘本者。庶幾知愧惕。莫令我震威。將爾歸消滅。我終爾誰救。我誅爾誰活。

懷恩以爲祭。賜爾弘玄德。整飭爾行爲。救恩徒手得。

第五十一首 懺悔吟之四 自新

求主垂憐。示爾慈恩。抹拭我過。昭爾大仁。爲我滌除。衆罪之痕。我已知過。衆惡紛呈。得罪我主。神鑑實明。宜受爾責。宜伏爾怒。嗟我小子。含罪而生。始孕母胎。自已染塵。主實明察。所悅惟誠。祈將慧光照我。五臟。灑以靈莧。潔淨吾魂。載沈載濯。玉潔冰清。錫我天樂。枯骨回春。莫視我罪。銷我邪淫。爲我再造。純白之心。正氣內纔。煥然一新。慈顏常照。聖神恆存。救恩不賈。怡怡欣欣。使我立志。樂道津津。會當指示。迷途諸人。回心轉意。歸與主親。污哉我手。血腥猶存。求我恩主。寬免罪刑。有生之日。宣揚洪恩。鼓我吟舌。奮我歌聲。燔牲祭獻。非主所珍。主之所悅。痛悔之忱。謙卑自牧。實懺聖心。求主美意。懷柔西溫。重築城垣。保大瑟琳。主於彼時。乃納犧牲。公義之祭。惟主德馨。聖壇之上。燔噴繽紛。

第五十二首 恃主與恃富

嗟爾濁世之家分。胡作孽以爲能。須知天主之仁分。乃亘古而長存。何爾舌之鋒利分。有如雉髮之刀。獨愛惡而憎善分。處卑污而爲尚。混與白其相混分。是與非其相淆。泛邪說以煽衆分。逞狡獪而造逆。誰知大綱快快分。將滅爾以終古。遂爾於家室之外分。除爾於永生之圃。善人觀此。初必愕然。

以驚兮。既乃欣然而相語。曰。盍觀彼人兮。實其咎由自取。平生不恃天主兮。而自恃其財富。怙惡不悛兮。自謂有如磐石之安固。何吾人之僥倖兮。獨有異乎是度。結根於主之園兮。若常青之茂樹。所恃惟主兮。永沐其澤。千秋萬歲兮。稱謝主德。何聖名之馥郁兮。長爲衆賢之所挹。

第五十三首 愚者之言

愚人心中言。宇宙無主宰。若輩何卑污。所行莫非罪。欲求爲善者。渾無一人在。

主曰九天上。俯首察生靈。儻有智慧子。願與主相親。紛紛在歧途。溷濁同垢塵。悠悠寰海內。不見有賢人。豈其作惡者。莫其纖屑知。何以不懷主。覷然食民脂。

惡人中心餒。無事亦惴懷。彼與爾爲敵。主已碎其骨。衆逆悉蒙羞。實憑主之德。義舉之救恩。宜曰西溫出。主必引衆俘。歸還其本宅。義舉與雅谷。歡樂將何極。

第五十四首 不義日斃

主兮救我。以爾方名。爲我伸冤。用昭大能。聽吾之禱。聆吾之音。外寇蠢起。暴徒橫行。集力相攻。欲圖吾身。心存邪惡。日無真神。

小子所恃。惟在聖躬。吾命之全。實賴聖衷。

多行不義。必也自斃。憑爾之誠。加以傾否。中心悅服。用獻吾祭。永誦聖名。聖名實美。重重患難。煙消

雲散。故人顛覆。歷歷在眼。至誠惟主。慈惠無限。

第五十五首 翻雲覆雨

懇切求天主。隨耳聽我禱。憐此耿耿懷。音容莫冥渺。起坐不能平。憂心自悄悄。被逼於仇讎。見愾於羣小。蒙我以惡名。猶猶何時了。恐怖欲喪魄。中心怒如搗。安得生羽翼。飄如雲外鶴。欲滴彼曠野。永與塵世隔。避此暴風雨。安然居寶塔。城市多喧紛。衆口何喋喋。懇祈我恩主。截彼讒人舌。營營城垣上。晝夜不曾息。悠悠都邑中。觸目皆罪孽。惡黨充街衢。行爲暴且譎。就中有一人。初非我仇敵。竟亦懷賊心。無所不用極。仇人尙可忍。敵人尙可避。今爾非異人。夙與我親比。彼此稱莫逆。相與共密議。攜手入聖所。對主表心志。

願彼負義徒。相率皆過死。惡貫既滿盈。活墮冥獄裏。豈能改吾度。一心惟恃主。呻吟徹晝夜。呼籲無朝暮。主必聞吾音。主必來相助。全我於危厄。脫我於衆敵。我求必見應。此輩將淪滅。目中無主宰。惡性終不改。賣友且背盟。口蜜心存害。其言柔如膏。傷人勝似刀。

一切委主手。必釋爾重負。善人爲主參。從來未曾有。

主必將惡逆。投入死亡獄。橫行無忌憚。豈能逃天戮。蕩蕩公平主。吾心之所托。

第五十六首 落魄之淚

求我恩主。憫此阨窮。惡黨攻我。厥勢洶洶。朝暮相逼。憂心忡忡。我之所恃。惟在聖躬。有恃何恐。聖德是歌。血氣之倫。其如予何。

泯泯莽莽。顛倒是非。希意加害。速其心機。鳩衆埋伏。窺我蹤跡。處心積慮。欲褫我魄。豈其作孽。可以自脫。惟求我主。降以顯罰。

顛沛流離。惟主知之。落魄之淚。惟主貯之。貯之於帝。錄之於書。懲彼凶惡。恤此無辜。固知聖心。未嘗棄予。有恃何恐。聖德是歌。血氣之倫。其如予何。

平生宿願。何以償之。中心藏之。何日忘之。誓將主德。宣而揚之。生我於死。扶我於傾。乃有今日。得慶再生。有生之日。報主之恩。以承歎顏。以熙光明。

第五十七首 時艱

主兮主兮。盍亦垂憐。心魂依依。托爾以全。願庇卵翼。度茲時艱。

呼籲至尊。顯爾大能。自天降佑。莫使併吞。敵人肆虐。祈爾施恩。悻悻翠逆。咄咄相逼。如獅之猛。如火之熱。爾若戈矢。舌同長戟。

惟主之威。峻極於天。光華煥發。普照人間。

敵人設網。以絆我足。世路日艱。我步日蹙。設筭我前。意在必獲。使之自墮。葬身深壑。

有主何危。方寸安寧。心懷大德。口發頌聲。昧爽鼓瑟。喚醒清晨。誦主之號。謝主之恩。以傳萬國。以告生靈。大仁塞宇。高義薄雲。

威靈顯赫。峻極於天。光華煥發。普照人間。

第五十八首 無日高高在上

嗟時俗之詭詐兮。背繩墨而改錯。中心懷惡兮。行不中矩。蓋自幼而已然兮。曾不改乎故度。其口如簧兮。其毒如蠱。猶虺蜴之自寒其耳兮。羌非術士之能御。猛如壯獅兮。牙如矛戟。惟祈吾主兮。厥牙是折。願其如水之覆兮。不可收拾。願其如弓之弊兮。矢不中的。願其如蝸牛之消形兮。載行載滅。願其如胚胎之流。匪兮。不見天日。果荆炊釜。半焦半青。旋風倏至。掃蕩廓清。使善人覩之而欣欣兮。濯其足於羣姦之血。使世人皆愕然而相語兮。曰善惡之報信。絲毫而無忒。孰云高高乎其在。上兮。實監臨下土而行其黜陟。

第五十九首 羣犬之狂吠

主兮主兮。其拯我於諸難。救我於作惡之徒兮。全我於暴虐之流。鳩衆而埋伏兮。惟吾命之是圖。無故而與予爲讎兮。非予之辜。求吾主之相援兮。莫付予於狂奴。求主一懲羣逆而莫予優容兮。豈黑白之可渝。羣犬晚歸兮。舉猶猶而吠予。橫行街衢兮。伺我於城隅。又申申而相警兮。口如刺人之刀。

意謂主不之聞兮。乘黑夜而狂號。吾知主必哂之兮。笑狂瀾之滔滔。

惟主爲吾之保障兮。吾當向主絃歌。主必迎予以仁慈兮。羣兇其如予何。惟毋遽加剪滅兮。恐吾民因無敵而荒怠。願竭力以驅逐之兮。使其不復爲吾族之害。何彼口之多孽兮。願呪詛之反膺其身。願聖怒之臨之兮。有如火之銷骨。漸削而漸弱兮。終雲散而烟消。俾世人皆識雅谷之主兮。莫敢於誇而自驕。

嗟羣犬之狺狺兮。乘暮夜而狂吠。張其口而覓食兮。歷深更而不止。徘徊於街頭兮。徬徨於巷尾。予則昧爽而懷主兮。獻頌美之晨曲。既有主爲岑樓兮。亦何恤乎榮獨。蓋有恃而無恐兮。聊詠歌以爲樂。

第六十首 神助與人助

吁嗟我主。蓋其有極。乘我如刃。令我如賊。祈主息怒。賜予休息。瘡痍滿目。大地崩裂。求主垂憐。敷以膏澤。

久矣爾民。受爾痛苦。飲之以酒。猛矣其烈。孰云瞑眩。莫廖厥疾。

我有采旄。大主所贈。以宣聖德。以揚惠音。主其引手。佑爾子民。

大主有命。吾心用樂。將分濕岑。將據岵谷。基列西蒙。莫匪我慰。法蓮爲屏。樹德爲牧。摩瓦作盤。夷東

霽。非蒨之野。供我歡躍。

誰能領我。毀彼崇墉。誰能引我。征彼夷東。我主胡爲。棄我泥中。我主胡爲。不護我戎。縱有人助。何以爲功。求主相我。克彼元凶。既有神助。吾氣則雄。主必佑我。消滅敵蹤。

第六十一首 高山仰止

我之哀訴。求主垂顧。雖在地角。惟爾是籲。用抒幽悵。用申景慕。

求爾指引。陟彼高岡。以資瞻仰。以避災殃。

永居聖所。安庇卵翼。心願見償。優游化域。

主福吾王。介以眉壽。眉壽無疆。皇輿不朽。俾承歡顏。以長以久。救爾仁義。以佐以佑。永頌大德。初服是守。

第六十二首 天平

心魂默默念天主。救恩獨自眞神出。主是我磐石。主是我救藥。主作岑樓。應無敵。爾曹何事肆凌虐。幸災樂禍。蓋有極。猶如衆手推欹壁。羣聚共商欲相傾。若輩所好惟詭譎。巧言令色亦何苦。口中祝福心中詛。吾魂且默默。靜候主恩撫。既有天主作金湯。中君泰然復何怖。吾民其恃主。向主披肺腑。雖在危厄終必安。主是吾人停泊所。

貧富貴賤皆泡影。泡影爲重。人生輕。若衡二者。天平上。人生應升泡影沈。暴虐安足恃。盜賊莫自矜。財帛縱進門。慎毋陷溺爾心魂。主曾一度言。我經二度聞。能力屬天主。慈德屬眞神。按人行實施。報應主之陰。隨悉公平。

第六十三首 明發不寐

明發不能寐。耿耿懷所天。如飢又如渴。心田枯以乾。因此求聖所。瞻仰爾光輝。懷德勝懷生。絃歌慰庭闈。一息苟尙存。誦主誓不輟。景慕不可言。舉手扞胸臆。心魂既伏足。頌聲發歌唇。輾轉於牀榻。默憶歷深更。一生承主体。雍雍庇卵翼。夢魂縈左右。聖手扶我立。咄咄逼我者。終究必淪滅。刀兵當不免。體爲豺狼食。主宜因主樂。聖民皆怡悅。巧言徒如簧。讒人當截舌。

第六十四首 天網恢恢

求我恩主。聽我哀訴。敵人謀我。我心恐怖。羣小紛紜。橫行無度。祈主保我。莫爲所誣。磨礪其舌。利矣其心。言如暗箭。中傷賢良。突然而發。得意洋洋。以惡相勸。逞其猖狂。設阱陷人。自誇謀賊。誰其覺之。作惡何妨。鈎心鬪角。競宣其長。

詎知天主。將射彼逆。突然一箭。恰中其的。按其所詛。自遭隕越。衆人觀之。搖首咋舌。悚然以懼。懷然而慄。口揚大猷。心懷明德。賢良正人。聞報欣悅。托庇於主。一生安逸。清明在躬。光風霽月。

第六十五首 甘雨

讚主於西溫。遠願向帝村。此舉最相宜。稱意慰心魂。
私心感我主。有求莫不應。但願血氣倫。翕然來歸順。
罪多氣消沉。孽重實難任。求主開慈懷。洗我愆尤汙。何幸蒙恩簡。得與主相近。居主廊廡下。怡怡共
相慶。會當昇其堂。會當入其室。聖堂向全美。聖室何純潔。願獲常在斯。酣暢主之德。
行見我恩主。應我以靈異。靈異何爲者。所以彰正義。

我主何堂堂。衆生所仰望。天涯與海角。莫不被其光。大能束其腰。神威鎮山嶽。狂濤靜以恬。萬邦皆
穆穆。四海統一尊。東西咸悅服。

聖心眷下土。沛然降甘雨。大地悉沾濡。原壤潤以腴。潯川溉田疇。百穀何興興。犁溝悉以盈。欲與犁
耨平。時雨信如膏。潤物細無聲。

春沐主之澤。秋食主之祿。芳蹤之所過。步步留肥沃。曠野被綠茵。山丘披青衿。寒谷生豐黍。農圃戲
牛羊。天籟宣淑氣。萬類吐芬芳。

第六十六首 如銀在鑪

惟願寰區。向主讚愉。歌頌聖名。宣揚德模。赫赫稜威。浩浩宏謨。衆敵畏服。萬彙翕如。心歌腹詠。齊頌

令譽。

告爾黎元。咸來觀光。主佑其民。神蹟輝煌。轉海爲陸。爲民康莊。孰謂河廣。徒步以行。征人歸鄉。歌舞洋洋。大主御宇。監臨萬邦。嗟爾叛逆。莫再怙強。

願爾萬族。讚主仁育。既保吾魂。亦扶吾足。賜我鍛鍊。如銀在鑪。加我困厄。勞我形軀。令彼敵人。虐我如奴。水深火熱。不遑寧居。試練既畢。惠以安舒。可不獻祭。用表區區。難中所嘗。寧可無孚。肥牛山羊。無美不俱。惟願芳馨。上達玉廬。

敬主之人。悉心靜聽。聽我宣布。主之救恩。平生仰主。未絕頌聲。我若懷邪。寧邀主問。竟蒙眷顧。垂注吾音。敢不稱謝。永懷慈仁。

第六十七首 豐年謝恩

求主垂憐。福我蒸民。求主開顏。光照世人。願爾聖道。風行八極。願爾惠音。播傳兆域。俾我衆生。咸誦大德。萬族欣欣。謳歌不輟。主將鞠民。睿斷正直。統御寰宇。與民休息。孰能無感。豐功偉績。大地向榮。滋生茂實。民生舒裕。實賴帝力。惟願率土。奉事無忒。

第六十八首 以正克邪

天主其興。一掃羣凶。行見悖逆。鼠竄無蹤。如蠶之散。如蠟之鎔。衆邪對主。無地自容。懜悌君子。體逸

心冲。既見大主。樂也融融。常承歡顏。和氣內充。

向主謳歌。歡呼聖名。何以迎駕。響遏行雲。聖名曰「爺」。可不尊親。主居聖所。福彼窮民。孤兒之父。嫠婦之鄰。恤彼榮獨。使成眷屬。釋彼冤囚。賜以康樂。澤所不賅。其惟怙惡。無悛於心。何可救藥。

主昔導民。經彼遐荒。天地震搖。西乃惶惶。沛然降雨。以潤焦土。聖民家焉。恩澤覃敷。主啓凱音。衆姝謠吟。敵軍之帥。倉皇四奔。深閨之女。戎捷是分。境內安懿。民如馴鴿。白銀爲羽。黃金爲鬪。列王被逐。紛紛竄逸。彷彿寒門。飄飄飛雪。維彼巴山。實爲靈岳。千峯競秀。聖心所樂。爾羣山。無然側目。天主居之。胡云不服。

主之車馬。十萬其強。奚啻十萬。其數無量。大主出征。西乃有光。我主既升。衆俘還鄉。萬邦獻珍。羣逆來王。歸斯受之。包穢包荒。

慈哉雅璋。日肩我累。釋我重負。扶我於墜。解我倒懸。脫我於死。惟彼冥頑。永不改悔。主施痛擊。頭顱其碎。

近自巴山。遠自深淵。凡屬吾民。悉使歸旋。傲頑之徒。爾其殄之。血濺爾足。衆犬吠之。

天主榮旋。普天瞻仰。何所于歸。歸于聖堂。歌人導前。樂正殿後。羣姝鳴鼓。翼其左右。義塞支派。同聲共奏。使雅明者。實爲最幼。蒙主拔舉。爲衆之首。次及樹德。布倫拿阜。濟濟牧伯。皆屬優秀。吾族之興。

實賴主佑。既立我先。必保我後。以爾駐蹕。於我瑟琳。萬王賓貢。莫敢不勤。如咒如牴。爲民荼毒。祈爾回禁。予以制伏。世人接攘。鈎心鬪角。金銀是寶。干戈是樂。祈爾奮起。加以顯戮。埃及來朝。古實畏服。普爾萬邦。歌功誦德。天主御宇。永古不息。發音如雷。布於寰域。峻極於天。坐鎮義塞。主賜其民。以勇以力。可崇惟主。聰明正直。

第六十九首 孤憤

水汜濫兮侵魂。求吾主兮來援。身深陷兮泥中。欲自拔兮無從。漂入兮深淵。滅頂兮狂濶。呼籲兮力盡。喉舌兮焦乾。俟主兮不至。望眼兮欲穿。

惡黨紛紛兮。擢髮難數。無理而與我爲仇兮。洶洶然其相侮。既誣予以攘物兮。又責予以返債。嗚呼天主兮。爾實知予之愚狂。予罪多參在上兮。恐欲蓋而彌彰。惟不欲因子之故兮。而貽特主者以慚惶。更不欲因子之故兮。而致求主者之失望。

夫子之蒙恥而受辱兮。非爲主之故乎。卽吾同胞之兄弟兮。亦因是而視予爲陌路。忠心耿耿以衝聖宅兮。一腔熱血。爲主而任勞任怨兮。身成衆矢之的。世人見予含淚而守齋兮。舉籍籍然而非之。見予披氈以爲衣兮。復振振焉而嗤之。聞人坐於城門而以予爲談資兮。酒徒亦將予編入醉後之歌詞。

予惟昔主兮是怙。求主及時兮祐護。按爾之仁兮。聽予之訴。依爾之信兮。鑒予之苦。拔我兮泥中。脫我兮諸兇。無使洪水兮溺身。無使深淵兮相吞。莫令予身兮。淪於地腹。應予之求兮。賜以仁育。祈回首而垂顧兮。以證爾恩之不薄。莫掩爾顏兮。於爾臣僕。予今在厄兮。相救務速。求吾主之惠。然來臨兮。濟此焚獨。嗟小子之多敵兮。微主其誰相贖。夫主固知予之窘狀兮。一身受垢而蒙辱。吾敵無數兮。悉在爾口。飽受侮辱兮。腸斷幽憤填膺兮。神昏舉目無親。誰與同情。欲求相慰。閱其無人。

人既令予嘗膽兮。又飲予以敗醢。願其筵席之化爲糝網兮。俾紛紛然而自穢。願其目之喪明兮。顧其腰之不支。願聖怒之加於其身兮。願其居室之成墟。予既受爾之懲創兮。彼又悻悻然而悔予。幸災而樂禍兮。加新痛於舊傷。願其罪上加罪兮。無與於吾主之恩光。願主除彼於生籍兮。勿廁之於義者之場。主必憐予之窮苦而無告兮。置予於高岡。予欲歌頌聖名兮。揄揚洪恩。主必悅納予之讚美兮。勝於純潔之犧牲。良善者將聞報而相慶兮。特主者當歡欣而鼓舞。蓋主樂於周人之急兮。何曾置囚徒於不顧。

吾願大地兮。共獻頌美。大海以及鱗族兮。亦應讚主無已。主必拯救西溫兮。重建樹德諸邑。俾其子民安居而樂業兮。子孫相繼而不絕。蓋惟敬愛聖名之徒兮。乃得優游化域。

第七十首 虧益益謙

殷勤求天主。速來救小子。小子罹患難。營救莫遲遲。務使謀我者。蒙羞而逡巡。害我適自害。一蹶不復振。今雖笑呵呵。來日其奈何。

願凡懷主者。雍雍主懷中。願凡愛主者。常將聖德弘。

小子貧且苦。求爾濟吾窮。爾乃我恩保。速來拯吾躬。

第七十一首 杏極望泰

小子何所依。惟有主雅璋。願主垂眷戀。莫令我抱愧。傾耳聽哀訴。援手昭正義。常作我磐石。俾我有所寄。於我有成命。保我如赤子。既爲我金湯。名實豈能二。求主賜拯救。脫我於醜類。主乃我之望。自幼所依恃。落地卽托主。須臾不曾離。呱呱出母腹。非主孰能致。感主好生德。歌誦無時已。笑罵由世人。造次必於是。頌辭發口角。終日詠仁惠。垂老莫見絕。衰邁莫見棄。不聞衆狡敵。猖獗向我吠。羣姦窺吾命。相聚議詭計。僉曰主所絕。彼又無人濟。吾人盍追擊。執之反掌易。主其毋遺遺。急起護危脆。但願謀我者。紛紛蒙辱恥。我當恆仰主。奉事益勤勵。口述爾之仁。及爾神奇事。教恩一何富。塵塵不勝紀。功德見神力。仁義爲微旨。自幼承主訓。一生資靈異。白髮莫相違。俾竟平生志。恭願將大德。宣示我後裔。經綸固炳煥。高誼益可佩。巍巍宇宙宰。誰堪與比擬。吾生歷憂患。皆爲主尸賜。所以玉我成。所以示微意。行見主震怒。引我出死地。令我得詞暢。將悲化爲喜。會當撫靈瑟。殷勤致讚美。絃歌

爾聖德。錫誥爾眞諦。脣舌宣讀愉。揚眉且吐氣。心魂荷救贖。頌聲訇然起。一日舌尙存。朝夕傳天理。不見昧心人。紛紛遭傾否。

第七十二首 六合同風

祈主相王。迪以聖謨。教彼王子。大公廓如。理民以正。保障無辜。山川稷穆。庶類侷命。盛德惟王。於貧恤孤。掃除盜賊。窮民以蘇。威如日月。萬世不渝。澤同甘雨。如膏如酥。草木以長。大地以濡。賢良雲興。四方恬愉。如月之恆。永燭寰區。四海爲家。八紘爲閭。遐荒賓服。頑敵候途。

他施之王。諸島之酋。示巴之君。西巴之侯。獻珍頌美。咸蒙懷柔。萬國衣冠。齊拜冕旒。拯難濟苦。生靈優游。無絕不繼。無勞不休。抑強扶弱。釋彼冤囚。

惟願我主。介爾眉壽。示巴之金。悉歸爾有。衆心所祝。衆口所碑。朝朝暮暮。無時或違。徧地豐稔。黍稷離離。乃至山巔。百穀滋生。汎汎翠浪。彷彿麗盆。邑民欣欣。如草在春。赫赫令譽。與日偕存。悠悠人世。賴以蒙恩。萬邦作頌。百祿萃身。

慈哉雅璋。義塞之主。神妙莫測。經綸實富。主之聖名。流芳永古。主之光榮。充布下土。耿耿之祝。湧自心府。誰爲此曲。小子大維。大維伊阿。耶瑟之裔。

聖詠 卷三

第七十三首 驕人好好勞人草草

天主待吾族。恩遇豈云薄。但能抱精一。莫不承優渥。我昔未悟道。顛冥將失足。鬪彼驕慢徒。作惡轉膺福。臨終無痛苦。垂老猶矍鑠。災難不及身。何曾嬰挫辱。佩驕以爲飾。擁暴以爲服。膾滿腸亦肥。熙熙恣其欲。顏厚口如贊。旁人不在目。誇誕凌雲霄。人實供浪譁。聖民亦眩惑。薰染於習俗。意謂主無知。高高何所屬。盍看彼羣小。嶄然露頭角。心跡蹤雙滑。增遇反日蹙。爲善而遭殃。何苦自縛束。我若隨聲和。將道子孫毒。欲探箇中理。枯腸費搜索。嗣蒙主啓牖。恍然有所覺。欲論世間人。應觀其終局。小人處順境。所以成其戮。灼灼何足恃。彈指歸寂寞。夢中雖云歡。覺後應悲哭。悲哭復何及。塵影淪幽察。曩昔懷不平。牢騷充滿腹。冥頑固不靈。愚蠢同六畜。幸未全離主。更承主教督。迪我以聖謨。入我光榮錄。在天惟有主。在地無他樂。身心雖枯竭。靈魂永有託。背主必淪亡。哀哉諸不淑。親主是良嗣。庇恩是卜。若會當述靈異。用抒我心曲。

第七十四首 伊於胡底

吁嗟我愚主。胡爲長不顧。何事對爾乎。炎炎熾悲怒。莫忘斯羣衆。夙爲爾所取。簡之爲聖民。殖之於

聖土。聖土非有他。西溫主所住。

請主移玉趾。一履荒涼地。聖所今何在。早被敵人毀。敵人何猖獗。狂嘯會堂裏。樹幟誌其勝。偶像處處是。持斧砍聖門。洋洋無畏忌。復以斤與錘。摧毀雕鏤器。聖所付一炬。所存惟遺址。侮鏤主之名。戮瀆亦云至。心中復自計。拔木須除柢。斯土諸聖堂。悉遭其焚燬。哀哉義寒族。不復見標幟。安得先知者。告我將胡底。仰天問我主。災厄何時已。豈能容衆逆。凌辱永不止。何以袖爾手。坐看橫逆恣。胡不伸右臂。痛殲諸醜類。

主是我之君。古今同一揆。昔佑我先民。功德不勝記。中剖彼大海。痛擊鵠頭碎。鱷魚亦粉身。委爲野狼餌。江河洞以乾。磐石噴泉水。此事亦云奇。非主孰能致。白晝與黑夜。莫非爾所隸。日月與星辰。莫非爾所和。坤輿定方位。歲時分四季。洪荒成宇宙。莫非爾所紀。

蕩蕩大地主。竟遭彼無禮。蠻子瀆聖名。誰復能忍此。莫將爾馴鴿。供彼豺狼飼。惟求我恩主。莫忘窮苦子。與我有啟言。主心寧有貳。黑闇寒氣。強暴滿塵世。莫令被壓者。飲恨以沒齒。務使無告者。讚歎于之惠。我王盍興起。一伸儲之義。不聞頑隳徒。謗瀆無時已。詎嘆微雲。應達天主耳。

第七十五首 黜陟幽明

告爾諸賢。稱謝所天。經綸炳煥。神力無邊。仰觀俯察。音容宛然。主曰時熟。將行讞鞫。彰我正義。賞善

謂惡。大地鼎沸。生靈塗炭。作之棟梁。以支危難。告彼傲人。去爾驕慢。告彼衆流。絕爾妄誕。毋讎爾頭角。毋矜爾強項。或東或西。乃至遐壤。上下八方。靡可仰仗。生殺予奪。惟主攸掌。此陟以升。彼黜以降。手挈瓠壺。滿貯烈燄。斟之酌之。餉彼惡黨。惡黨傾飲。至於糟粕。諦觀妙道。手舞足蹈。雅谷之主。中心所好。福善禍淫。安良除暴。

第七十六首 天心厭亂

威名震樹德。令聞邇義寒。瑟琳爲亭園。西溫爲第宅。我主居其所。安坐鎮六合。盡折弓與箭。罄毀盾與戟。聖心厭戰爭。欲與民休息。

我主居靈巖。榮威何赫赫。強梁皆伏辜。相將填溝壑。窮兵黷武者。無所措手足。一怒定乾坤。車馬歸寂寞。

可畏惟天主。誰堪當其怒。自天降詔命。四海肅以飾。地上行讞鞠。良善蒙恩撫。世人之悲憤。適足成主榮。願將其餘怒。化爲救世音。

誓願與還願。當向爾恩神。各應發所有。獻主表爾誠。務使衆牧伯。克己以歸仁。

第七十七首 念舊恩

向主發哀聲。求主傾耳聽。小子處患難。求主賜哀矜。中夜舉雙手。寫我仰慕情。仰慕無時已。起坐不

能平。思主令人瘦。心如困宿醒。通宵不成寐。黯然而銷魂。默默思古昔。依依舊日恩。舊日恩何盛。歎歌徹深更。

昔樂今何苦。撫心索其故。我主豈遐遺。棄置不復顧。仁淵寡枯涸。信義不復著。聖心詎能變。忘終而懷怒。主若不見佑。小子將誰怙。

小子且無躁。一憶主所作。經綸何煥煥。聖蹟何卓卓。舊日之大猷。歷歷猶如昨。靈異超衆神。全世所仰。颺迎其大手。臂。子民承恩贖。斯民誰之裔。若瑟與雅谷。

洪水見主憐。諸淵見主懷。行雲而施雨。中天降霹靂。颶風宣靈威。雷光耀八極。大地亦震顛。萬類皆驚揚。主行大海上。孰知其蹤跡。每瑟與亞倫。被擢爲牧伯。主實假其手。納民於軌物。

第七十八首 先民之頑梗

咨爾百姓。諦聽吾訓。啓唇設譬。發古之蘊。歷祖所傳。吾言有本。以授子孫。寧容有悞。俾我來胤。咸知歌詠。誦主之德。揚主之勳。主保吾族。法度以定。叮嚀歷祖。守之惟謹。並告後世。恐懼修少。惟主是仰。惟主是信。克念聖蹟。允遵大命。毋效乃父。頑梗成性。懷主不篤。厥心不正。法蓮子孫。攜弓手刃。臨陣之日。逡巡而逝。背棄盟約。不守明令。忘懷大德。不念靈應。昔在埃及。瑣安之境。大主顯靈。出奇制勝。分裂大海。以作行徑。令彼滔滔。壁立如凝。白雲晝導。明燈夜引。曠野無水。羣民思飲。主乃擊石。源泉

混混。流水成川。焦壤以潤。羣民無饑。厥欲是逞。私心怨主。盍賜佳餅。心怨口譏。主亦何吝。既能開石。泉水流注。胡不設筵。餉以珍品。雅瑋聞語。炎炎其忿。其忿終何。怒其不順。大主雖怒。不忘慈憫。號令諸天。洞開厥闕。嗚哪如雨。自天而隕。天神之糧。厥民是贈。人人飽飫。靡有不罄。東風宣和。南風解慍。降肉糲粉。集鳥如雲。既食且飽。貪欲未寢。食猶在口。聖怒大震。肥者壯者。殄戮殆盡。作惡如故。尙不知警。主乃降罰。紛紛天折。肅殺之威。令人懷慄。死喪臨身。火燃眉睫。大聲疾呼。求主救急。至是方知。主乃斲石。媚主以口。詰主以舌。意實未誠。心存詭譎。雖立盟誓。厥言是食。慈懷包荒。赦其罪孽。惡雖盈貫。未予殲滅。不爲已甚。聖怒屢戢。念彼衆生。原係弱質。如風之過。一去無踪。所恨若輩。背叛頻迭。率彼曠野。與主爲敵。瀆主犯聖。無所不極。忘恩負義。不念異蹟。主在昔日。如何拯救。主在瑣安。如何提挈。埃及之川。悉變爲血。使彼敵人。無以止渴。蒼蠅成羣。蝦蟇充斥。爲災爲祟。以嘍以嚙。蟲食其稼。蝗毀其穡。雹傷葡萄。霜殄桑葉。冰炭俱落。滅彼六畜。厥怒奮揚。厥氣震烈。降災無口。百神施罰。天怒暢遂。降彼癘疫。埃及全境。盡喪家息。哈苗之營。壯丁絕跡。惟於吾族。寵命獨降。牧之如羊。曠野之中。以導以引。安步從容。海水汜濫。羣敵滅蹤。乃經邊疆。乃抵畿封。原壤高敞。聖意所鍾。誦夷被逐。以殖吾宗。頑梗如故。聖命不從。捨正就邪。一如乃翁。不中正鵠。彷彿弊弓。高壇徧設。偶像是崇。輕干天怒。觸逆聖衷。天怒霹靂。痛絕羣兇。飄然遠颺。離彼闕宮。選民被擄。紛紛受戮。不敬天怒。遭此荼毒。壯年

之男。葬身火腹。閨中之女。終身寂寞。祭司被殺。寡婦不哭。主心慨然。不忍長剝。擊潰敵人。永令蒙辱。西羅之幕。非主所樂。法蓮之支。未蒙簡擢。獨選樹德。眷戀靈嶽。峨峨聖所。實主所築。安如大地。終古自若。復拔大維。尤其忠僕。本在牧場。羊羣是督。主獨舉之。使爲民牧。以治義寒。以正雅谷。勵精圖治。盡其忠懇。納民軌物。實憑經略。

第七十九首 民族之厄運

我主我主。盍一眷顧。異邦之人。作孽無度。侵爾畿輔。辱爾聖所。毀爾京城。殺爾子民。子民之屍。委諸飛禽。聖徒之肉。委諸羣畜。流血成潦。盈我四郊。積骨如柴。無人葬埋。見啜鄰邦。遺笑四方。炎炎天威。盍其有哭。列國蠢蠢。何曾識主。主何恬然。慙怒不怒。雅谷被吞。主寧無視。先民之罪。莫歸斯世。開爾慈懷。憫我造次。爲爾命名。救我顛沛。爲爾光榮。赦我罪戾。莫令異邦。長加譏刺。曰『所謂彼主。究在何處。』恤爾子民。所流之血。使彼列邦。知所警惕。冤囚之泣。祈爾聽之。待死獄中。祈爾拯之。鄰邦之誑。祈爾懲之。懲之如何。七倍以厲。俾爾所牧。稱謝不已。頌揚大德。乃至世世。

第八十首 葡萄樹之被折

義采之大牧。垂繩吾之罽。若瑟爲爾羊。端賴爾引導。望爾駕飛神。發揚爾光曜。庶幾我法蓮。馬拿使雅明。瞻仰爾靈山。活潑爾救恩。求主愍吾族。賜我以復興。主但一開顏。吾人卽見拯。雅璋萬有宰。胡

爲長相贖。何時霽聖怒。聽我哀禱聲。爾民日戚戚。涕淚充飲食。皆爲主所賜。幾時得休息。哀哉我鮮民。已成衆矢的。鄰國鬪瓜分。相顧笑嚇嚇。祈主一顧盼。加我以慈色。顛沛亦已甚。仰主賜救拔。吾族在昔日。備承主之德。猶如葡萄樹。移之出埃及。諸夷旣被逐。植之於聖域。園地沃且廣。根深自條達。山嶽被其蔭。翠柯如靈柏。扶疎臨海角。蔓衍到幼法。今何毀其籬。行人競相折。旣爲野獸餌。又被林豕踏。勤懇求恩主。回首一眷顧。自天注爾目。視此葡萄樹。旣爲爾手植。應蒙爾愛護。夙爲爾碩果。而今一何苦。被焚且遭伐。凋謝緣聖怒。吾族爾所寵。祈爾賜佑輔。全我於危厄。莫令我離主。求主一顧盼。加我以慈色。顛沛亦已甚。仰主賜救拔。

第八十一首 存天理去人欲

我願雅谷之後裔。引吭高歌主之美。攜爾金鼓與琴瑟。共奏一曲誦雅璋。新月盈月宜吹角。佳節原爲主所制。曩在出征埃及時。已爲若瑟定此例。

當時聞異音。聲聲入我耳。我已釋爾肩。上累我已脫爾手中篋。爾昔呼籲危難中。我卽援手將爾濟。我自雷霆深處應爾求。復於風波場中砥礪爾心志。吾民其諦聽。義塞其注意。異端慎無攻。邪神切莫事。我是雅璋爾之主。攜爾脫離埃及地。但須爾張口。我必賜供飼。詎意吾民莫我聽。義塞之裔將我棄。縱人欲。昧天理。愚而好自用。冥頑不靈徇私智。吾民倘回頭。聽我諄諄誨。吾必克其敵。手擊衆

醜類。悖逆悉歸化。爾族興隆千萬世。賜爾嘉麥實爾腹。巖中湧蜜作爾餽。

第八十二首 決獄務平

主在聖會中。審判諸神道。汝等行訊鞫。是非皆顛倒。目中無法紀。罔然媚強暴。泯泯復莽莽。將於何時了。胡不恤孤貧。胡不扶窮民。秉公斷曲直。掃除諸不平。保障寡與弱。莫被羣兇凌。

若輩何昏昧。不復識天理。徬徨黑闇中。綱常已頽廢。我稱爾爲神。且爲至尊子。今與世合污。應與人同死。又如彼侯王。終必見傾否。生前作威福。沒世長已矣。

願主速興起。黜陟人間世。願爾撫萬邦。神器原屬爾。

第八十三首 反主同盟

蕩蕩造化主。誰能與比侔。祈主毋緘默。祈主毋長幽。羣逆正騰沸。竟與主爲仇。側目視天主。洋洋昂其頭。欲害主所庇。相聚共議謀。咸曰滅義塞。莫令厥名留。諸兇惟一心。反主成同盟。夷東以示之戰。棚。摩亞阿甲之土人。迦巴阿門亞瑪力。非瑣諦羅之居民。亞述亦與之聯合。共助得之子孫。求主處羣逆。一如昔日處米町。又如龔在基順水。對待西拉與亞賓。紛紛隕命於隱朵。血肉塗地染垢塵。求主磔彼衆牧伯。一如阿立西伊柏。求主殲彼諸侯王。一如西伯撒摩納。主豈不聞其狂言。『吾欲併吞主第宅。』願主使彼如糠粃。隨風飄蕩無寧息。求主遣鷲鷗。願主發雷霆。驅逐衆悖逆。如火燒

山林。令彼無所措手足。汗顏無地呼主名。恥辱蒙其首。愴悅歸幽冥。務使衆逆知。雅瑋是真神。普天與率土。惟主是至尊。

第八十四首 眷戀庭闈

萬有主宰。爾宮可愛。夢魂依依。庭闈藹藹。心歌腹詠。生靈淵海。

嗚啁之雀。樂主之廕。燕亦來巢。言哺其雛。優哉游哉。雅瑋之徒。聖門之內。可以安居。絃歌不絕。和樂以舒。

仰賴所天。終日乾乾。永懷大道。神形兼全。行經悲谷。化爲甘泉。及時之雨。膏澤是宣。愈行愈健。彌勞彌堅。竟抵西溫。直達主前。

向主投誠。祈主俯聽。庇主之蔭。祈主垂青。在斯一日。勝似千春。寧在主宅。充一闈人。莫爲惡逆。入幕之賓。以熙春陽。以潤吾身。寵惠備至。百祿是膺。大主何私。忠貞是親。一心特主。樂哉斯人。

第八十五首 天人交歡

感雅瑋之眷聖地兮。領回雅谷之衆俘。宥我之罪兮。除我之辜。慶天威之新霽兮。祈轉否而爲泰。豈仁主之怒吾族兮。互百世而不改。其卽復蘇爾民兮。俾融融於爾之懷中。沐浴芳澤兮。酣暢春風。諦聽聖言兮。其聲若蘭。主願與子民言歸於好兮。苟若輩不再陷於冥頑。但能小心翼翼以事主兮。

應證救恩之實。邇行見光榮之重。臨兮。盤桓乎吾地。仁慈共妙諦交歡。正義與和平吻合。妙諦自地而萌兮。正義由天而發。夫唯雅瑋之降甘霖兮。吾土乃騰茂實。以仁爲居。以義爲路。康莊大道。衆庶所步。

第八十六首 仁淵義府

求主傾耳。垂聽我訴。憐我軫軻。恤我貧苦。聽我丹忱。保我子身。吁嗟吾主。拯爾微臣。小子何恃。實惟真神。朝夕呼籲。蓋不見於。引領望主。寬慰吾魂。仁恕惟主。恩澤豐盛。凡百有求。靡不見應。請聽吾禱。聆吾哀聲。我今有難。求主開恩。固知我主。必惠佳音。

衆神之中。孰堪配主。功德無邊。超絕寰宇。萬邦兆民。主所締造。胡不歸順。顯揚尊號。真宰惟主。經綸浩浩。求主教我。服膺聖道。惟精惟一。是則是效。凝神專志。昭事恩保。千秋萬歲。宣揚真教。主之待我。恩德不小。拯吾之身。出於泉窖。驕人倖倖。逞其狂傲。羣逆結黨。恣其凶暴。日中無主。哀哉不肖。慈悲惟主。不易有怒。仁愛之淵。信義之府。祈主眷顧。祈主垂恤。維護爾僕。爾婢所出。示以愛徵。用昭大德。賜以神助。加以慰藉。敵人見之。庶幾惶惕。

第八十七首 念本

主之安宅。在彼靈山。雅谷宅第。奚啻萬千。獨巖西溫。厥門嫋嫋。

於極聖邑。光榮何極。拉哈西比。爲子素識。非瑀諦羅。乃至古實。莫不歸化。視同已出。善百之母。當推西溫。某也某也。皆彼所生。厥福之源。實惟至尊。

主歸聖民。錄之於册。彼哉彼哉。西溫所出。

潤爾歌音。鼓爾鳴琴。吾輩生源。悉在西溫。

第八十八首 處困籲主

一心懷恩主。哀嘆徹朝暮。願爾納我禱。聽我聲聲訴。

百憂結柔腸。吾命瀕危亡。雖生無異死。無告亦無望。譬彼陳死人。寂寞杳冥鄉。久爲主所絕。已爲主所忘。處身幽壑中。黯澹不見光。聖怒加吾身。風濤不堪當。相識日以疎。視我爲不祥。身困重重縛。末由脫其纏。愁多日已枯。呼主朝復暮。每每舉雙手。聊抒中心慕。開言問吾主。胡爲長相苦。人死既瞑目。大獄誰復覩。氣絕已吞聲。寧能揚令譽。頌聲淪幽冥。雅音絕邱墓。誰在無光地。能將明德布。何以夙夜祈。不見主垂顧。吾命一何薄。自幼飽辛楚。每思主之威。恐怖寒臟腑。如何血肉身。能載主之怒。怒濤激我頂。何日見恩撫。舉目無所親。所見惟陰府。

第八十九首 天主之盟

歌詠主大仁。傳述主大義。仁義固無窮。祿誦亦不已。惟仁爲安宅。惟義乃天梯。

「我與僕大維曾訂一盟誓。『保定爾宗室。皇輿永不替。』」

靈隨燦中天。信義照聖會。天上主獨尊。人間誰能比。赫赫臨天朝。雍雍衆聖侍。浩浩宇宙宰。威儀實大備。全能亦全信。孰敢不敬畏。神威鎮滄海。狂濤應聲止。痛擊拉哈伯。一蹶不復起。掃蕩諸悖逆。端賴大手臂。天地爾所有。乾坤爾所締。北方與南極。莫非爾所紀。他泊與門。誦名不勝喜。聖臂具大能。神權無比擬。正直與公平。實爲御座址。信義與仁愛。充主之前騎。諳爾福音者。當膺無窮祉。怡怡復欣欣。安步明光裏。樂天緣聖名。條達賴真理。嶄然露頭角。非主孰能致。義塞之恩主。吾族所托庇。主曾憑異像。示彼有道人。『吾於爾族中。已得一俊英。俊英非有他。大維爲吾臣。吾心之所鍾。膏澤被其身。親手加扶佑。使其永固貞。敵人不得擾。凶逆莫之凌。與彼爲敵者。紛紛必見傾。吾仁與吾義。長與彼爲鄰。使彼賴聖號。頭角得崢嶸。威權及大海。統治達河濱。向我披心腹。呼我爲慈親。』爾爲我金湯。爾爲我恩神。『彼乃我家息。德威超萬君。恩寵靡有極。一如吾所盟。大維之苗裔。綿綿萬世存。大維之宗室。大地共長春。子孫苟離經。不守吾規箴。金科與玉律。棄置不復遵。吾當加鞭策。降罰以爲懲。終不爲已甚。怒中留餘恩。盟約焉可廢。言出豈能更。吾旣向大維。立誓見吾誠。後嗣必常與。宗室如大明。明證懸中天。有如月之恆。』

今者竟何如。乘置莫復論。昔蒙爾膏澤。今遭爾之瞋。盟約見厭惡。冠冕委垢塵。屏藩盡被撤。岑樓悉

淪泯。行人恣劫奪。鄰邦咸相輕。敵人蒙提拔。洋洋喜氣騰。大維遭顛覆。寶劍喪鋒稜。光輝入明夷。皇
輿遭覆轡。年壯氣已衰。恥辱實頻仍。何時開聖顏。何時息炎蒸。應憐年光促。人生似浮萍。誰能無老
死。誰能逃幽冥。吾恩今安在。信誓豈無憑。爾僕蒙大辱。吾主寧不矜。強敵日相逼。何以舒憂心。蹙蹙
靡所賜。何日聞德音。德音一何美。萬世所仰欽。

聖詠 卷四

第九十首 人生

安宅惟真宰。庇人互萬代。未有天地前。吾主先已在。無始亦無終。獨立永不改。悠悠人世子。終須歸塵土。遲速承主命。爾今可回去。千秋在主目。不過一朝夕。又如中宵夢。夢醒更已易。光陰似急湍。漂人到大海。人生如朝菌。晨榮暮凋謝。況復值聖怒。孰能無懼惕。吾罪參在上。隱惡何從匿。度日寔威下。終身一歎息。人生七十年。康強至八十。中間惟愁苦。俯仰成陳迹。一念主之威。不寒自懷慄。願常存此念。俾啓超凡識。爾僕嗚嗚望。天威何時霽。求主早開恩。清晨加仁惠。俾我樂餘生。絃歌度年歲。計我往日苦。授我來日愉。失於東隅者。畀我收桑榆。望主顯大能。莫令僕向隅。佑我建大功。流澤永不枯。

第九十一首 聖道保身

居止至尊之堂奧。必得優游覆育下。我之金湯惟雅璋。除主寧復有廣廈。主能出爾於羅網。癘疫不加爾身上。翼卵胸伏恩罔極。聖道保身洵不妄。夜間無有諸恐怖。白日無慮中飛箭。午夜魘魅不爾擾。中晝羣魔不爾殄。千人萬人倒爾側。死喪之威爾獨免。親見惡人遭報

應。天主待爾恩不淺。既以至尊爲安宅。免爾災難報爾善。主必叮嚀衆天神。左扶右翼免爾傾。惟恐爾足觸蹟石。天神親手托爾身。豺狼虎豹不能害。猛獅毒蛇供蹂躪。

彼既向我致丹忱。寧能孤負有心人。將彼拔擢登高位。以彼永懷予之名。彼有所求吾必應。彼有急難吾必拯。介以眉壽與榮秩。使彼酣暢我救恩。

第九十二首 庭植嘉樹

稱謝洪恩。歌頌至尊。此事洵美。怡悅心魂。

朝誦爾仁。暮詠爾信。撫我十絃。寄我幽韻。諦觀大猷。令我心醉。心醉如何。歡歌不已。功德浩浩。不可思議。聖衷淵淵。經天緯地。豈彼冥頑。所能領會。

紛紛羣小。譬彼茅草。乘時蓬勃。終付一燒。天天灼灼。豈能長好。至尊惟主。眞貴惟道。統御萬有。永不枯槁。

與主爲敵。以卵投石。嗟彼羣小。心勞日拙。

心感我主。崢嶸我角。澡身浴德。芳澤是沐。目覩敵愾。親聞其譟。以戒以愼。以欣以樂。

雍雍君子。何以比擬。鳳尾之棕。鬱鬱葱蔥。麗益之柏。暢茂條達。植根聖圃。霑溉化雨。經霜猶青。歷久彌固。嘉實累累。綠陰交布。以表正直。以宣永祚。

第九十三首 王道與霸道

雅瑋御宇。威儀堂堂。德以爲衣。能以爲裳。建立下土。綏以寧康。皇與永固。神權無疆。洪水氾濫。浪濤澎湃。赫赫在上。坐鎮四海。狂瀾以恬。聖道常在。千秋萬歲。庭闈蕩蕩。

第九十四首 聰明正直

勤懇白雅瑋。爾乃報應主。願爾勃然興。一鞠斯寔宇。務令驕慢徒。受其所應得。兇暴恣橫行。將至於何日。炎威不可當。炙手信可熱。蹂躪爾天民。摧殘爾基業。孤寡與羈旅。莫不受荼毒。意謂主無眼。不復眷雅谷。

麻木焉得仁。冥頑何時靈。孰云作耳者。自身反不聞。孰云造目者。自身轉無明。孰云化育主。無權施鞭撻。孰云甄陶主。莫具超人哲。固知人千算。心勞徒日拙。受主諄諄誨。斯爲無上福。履險亦如夷。坐看敵人覆。寧能忘天民。寧能棄基業。公道歸無辜。凱音屬正直。誰爲我禦侮。誰相我抗敵。若非主相佑。久矣歸冥寂。甫云將失足。慈恩扶我立。愁思千萬緒。思主是一樂。兇逆居上位。弄法施暴虐。害良殺無辜。豈能邀主悅。主是我岑樓。主是我磐石。羣小罪盈貫。必遭主殲滅。

第九十五首 百神之君

嗟我良朋。盍興乎來。向主獻歌。歌聲和諧。惟我恩主。爲我磐石。何以朝覲。心懷大德。詠詩頌美。扞我

怡悅。

偉哉造物。百神之君。高山深谷。咸賴陶鈞。浩浩滄海。茫茫大陸。莫非主屬。聖手所作。可不稽首。可不跪拜。感激涕零。昭事眞宰。吾人何幸。蒙主寵愛。救我如羊。靡有倦怠。今聞慈音。毋閉爾心。炯戒不遠。在爾先人。雖遭百罹。猶不知悛。率彼曠野。頻忤吾神。目擊大猷。冥頑不靈。心厭彼逆。垂四十春。中心懷邪。天理不明。吾憤乃誓。不令安寧。

第九十六首 普天同慶

我願普天下。向主奏新曲。同聲誦聖名。朝朝詠拯贖。播榮於兆民。宣德於萬族。大主宜大讚。稜威超百神。列邦所供像。無生焉得靈。惟主是眞宰。親手設諸天。美德總心府。光輝發於前。萬民應感德。歸榮生命淵。頌美且獻珍。咸集主宮庭。聖潔以爲佩。朝拜爾尊君。凡屬血氣倫。孰敢不肅穆。雅瑋御寰宇。舉世蒙仁育。安撫我百姓。秉公行訊鞠。

諸天應怡悅。大地當歡騰。滄海洋洋舞。田疇吐芳芬。萬木吟春風。欣欣咸向榮。大主已臨格。將審率士民。眞宰樂平章。容斷公且明。

第九十七首 佳音

雅瑋御寰宇。監臨斯下土。大地應騰歡。諸島宜鼓舞。

靈燧圍周市。幽深不可窺。仁義與正直。實爲御座基。烈火爲前驅。焚燒諸叛逆。靈光燭宇宙。坤輿憊焉懷。衆岳攝天威。紛紛熔如蠟。諸天宣義理。萬民仰光烈。奉事偶像者。終必見阻越。願爾諸神道。敬向主屈膝。佳音燠西溫。靈燭慰樹德。赤城如靜女。聞風坐相悅。至尊惟眞主。衆神所仰矚。傳語愛主者。愛主當疾惡。主必採良善。羣小休糾纏。光明播心田。神樂湧如泉。雍雍諸君子。耿耿懷所天。稱謝主洪恩。永將芬芳宣。

第九十八首 新曲

向主奏新曲。暢詠主靈蹟。主憑大手臂。作成救世業。福音已昌明。正義燭兆域。恆懷信與仁。奔願我義基。救恩被邇遐。舉世所目擊。普天應同慶。引吭寫歡悅。頌美宜鳴琴。歌聲貴和協。吹號且吹角。欽崇天地王。滄海騰證儉。水族舞洋洋。大地及衆生。欣欣仰春光。洪濤齊鼓堂。羣山吐芬芳。主將鞠大地。世事賴平章。容斷惟正直。哀矜見慈腸。

第九十九首 篤實光輝

主坐飛神上。赫赫臨下土。大地肅肅仰。萬民懷慄懼。駐蹕西溫山。浩氣塞寰宇。衆庶所愛戴。至尊惟眞主。恆應誦聖名。用表敬與慕。神力既無邊。正直蘊心府。連其大手臂。建立公正序。教我義羣民。兢兢守法度。爾應向聖君。中心懷畏怖。每惡與亞倫。充主祭司伍。自古敬主者。虔誠數撒母。諸聖顯雅

璋。雅璋應其籟。復自雲柱中。諄諄與之語。教之遵典章。翼翼中規矩。愆尤蒙糾正。益見絃恩富。我願奉主者。朝拜向聖嗣。主乃造物宰。神聖實昭著。

第一百首 升堂

大地歟騰。咸誦主恩。何以事主。和樂且湛。何以承顏。響遏行雲。於穆真宰。天地之王。作我蒸民。仁育無疆。主爲我牧。我乃其羊。既入其門。既升其堂。歌功詠德。厥聲琅琅。聲教四訖。莫非爾極。世代緜緜。慈恩不竭。

第百有一首 親君子遠小人

我於天主前。立志爲聖賢。吟詠惟仁義。歌誦惟所天。孳孳遵大道。兢兢莫踰閑。主肯惠然臨。我心固以貞。修身以齊家。蕩滌邪與淫。痛絕虛僞習。根拔悖逆意。傲者我莫親。讒者我所棄。惟願求賢良。與我共國事。簡拔忠實徒。充我心腹衷。行見我宮中。無復奸佞跡。挾私懷邪者。不復近我側。夙夜勸自強。殲滅諸悖逆。務使天主城。煥然成聖域。

第百有二首 懺悔吟之五 末恩

願主聽我禱。呼籲達尊前。小子忠難日。莫掩爾慈顏。小子竭聲呼。營救莫遲延。歲月容易度。消散如

雲煙。精力已枯焦。有如火相煎。我心如秋草。萎頓不復鮮。遑遑若有失。無意沾盤餐。形容消瘦盡。長嘯更短歎。

鷓鴣啼荒野地。鴉泣淒涼天。孤燕棲空梁。夜夜不成眠。與此相彷彿。我情亦堪憐。頑敵不相饒。終日苦糾纏。惡仇謀吾命。相將立誓言。風塵充餼糧。涕淚和水飲。祇緣主震怒。顛沛一何甚。昔蒙主高舉。今爲主遐遺。日暮景翳翳。吾生復幾時。主若不反顧。將隨秋草萎。吾主坐天闕。萬古永不移。神威日日在。榮名世世垂。吾主必興起。愍我西溫卑。西溫卑已極。蒙寵宜今茲。爾僕戀西溫。恩愛無與比。旣珍西溫石。亦憐西溫泥。主建西溫後。風光應無涯。萬民必賓服。百王來觀儀。主已聽我禱。未蔑卑者祈。書此傳後裔。俾知頌雅璋。主自九天上。監臨人間世。垂聽幽囚泣。親釋羈魂縲。惟願我子孫。讚主無窮已。西溫全盛日。瑟琳映光輝。萬邦旣齊集。爾當宣主美。

我躬逢聖怒。中道將衰落。長跪白我主。盛年莫見折。我主壽無量。豈靳此一勺。我主立地基。親手設天幕。天地終消毀。惟主長卓卓。乾坤乃主衣。衣敝換新服。萬物有變化。惟主無今昨。還望我子孫。綿綿相嗣緒。常立主之前。長蒙主之福。

第百有三首 慈父

吁嗟吾魂。盍不頌主。宜將聖名。銘諸心府。

吁嗟吾魂。盡不感主。恩澤綿綿。嘉惠無數。赦爾諸罪。蘇爾疾苦。赦爾於死。冠以仁恕。餒爾心願。豐爾毛羽。雖老猶健。如鷹如虎。

公平惟主。屈者得直。煌煌聖範。親授每瑟。教我義舉。順主之則。可則惟主。慈惠和藹。緩於譴責。富於仁愛。卽有恚怒。移時則解。吾人之罪。已蒙寬貸。如天之覆。如地之載。天高地厚。主恩莫大。脫我於罪。如隔絕塞。所望吾人。敬主毋懈。人能敬主。必蒙青睞。父之憐子。尙有不逮。

寬綽惟主。諒我人性。我本泥土。主所陶甄。人生如草。當春發榮。朔風一至。杳焉無存。踪跡蕩然。一如未生。所恃我主。大慈大仁。千秋萬歲。常若和春。懜懜君子。聖道具遵。必蒙眷顧。澤及子孫。

明明在上。統御萬有。凡百天神。敢不稽首。諦聽妙音。兢兢自守。凡百天民。敢不跪拜。小心翼翼。昭事眞宰。芸芸衆生。充塞宇宙。敢不稱謝。主德之茂。吁嗟吾魂。頌讚神祐。

第百有四首 偉哉造物

吁嗟吾魂。盡不頌主。我主蕩蕩。威耀寰宇。披光爲裳。黼黻文章。展天爲幕。庇覆八荒。建宮水中。峩峩其梁。駕雲馳騁。御風翱翔。風以爲驛。音布四方。火以爲臣。邇遐仰光。

地基既立。永不動搖。被之以水。有如褊袍。厥水滔滔。淹彼岩嶮。我主怒譴。退彼洪濤。備主雷震。浚巡潛逃。山巖以升。衆谷以沈。高卑定位。齊合天心。作之防閑。莫使相侵。引泉入谷。水流山麓。羣獸來飲。

野驢解渴。飛鳥來集。巢於其林。相顧而樂。嚶嚶其鳴。主自高宮。沐山以霖。大地欣欣。結實益盈。離離芳草。飼彼六畜。青青新蔬。酬人勞作。俾我芸芸。取食地腹。酒以怡神。膏以潤顏。餅餌養生。可以永年。相彼喬木。酣暢芳澤。龍盆之柏。主所手植。以棲衆禽。以憩倦翮。雍雍慈鶴。家於喬松。膺膺山羊。盤桓層峯。爰爰眇喙。深居巖中。

中天挂月。以序節。日輝驕陽。出納無忒。沈沈晝夜。羣獸乃出。獅吼林間。向主求食。東方既白。遍返其窟。惟我蒸民。與彼異轍。日出而作。日入而息。夙興夜寐。無敢荒逸。

巍巍我主。經綸無數。陶鈞萬物。澤被寰宇。相彼滄海。浩蕩無垠。鱗族繁滋。巨細成陳。以泳以游。載浮載沈。以通舟楫。以憩鱣鯉。凡屬受造。仰主資生。按時給食。自有權衡。彼之所受。莫非主恩。主恩不置。亦富亦均。主但掩顏。庶類遂塵。一經溫煦。大地回春。惟願我主。光榮長存。惟願我主。悅澤生靈。聖目一視。大地震顛。聖手一指。羣山噴焰。終吾之身。惟主是讚。有生之日。惟主是歎。惟主是樂。惟主是戀。耿耿此心。倘邀聖眷。願彼羣小。絕跡地面。掃蕩廓清。不復爲患。吁嗟吾魂。可不頌主。芸芸衆生。歡忭鼓舞。

第百有五首 主恩罔極

懷恩主。誦聖名。向衆庶。宣經綸。宣謳歌。獻頌美。念大德。述靈異。以聖名。爲爾飾。仰主者。自怡悅。眷雅

璋慕其德。承色笑。樂何極。憶偉業。主所作。彼靈異。何卓卓。亞伯漢。主之僕。雅谷伯。蒙拔擢。聖祖裔。可不勉。能敬主。庶無忝。我真主。惟雅璋。彼宏謨。塞天地。主不忘。所盟誓。將聖言。詔萬世。受盟者。亞伯漢。聞誓者。曰義繖。向雅谷。申舊命。俾吾族。永保定。吾賜爾。迦南地。爾子孫。繩繩繼。嘗彼時。人可數。在迦南。如客旅。游列國。與雜處。矜其寡。賜佑護。誠君民。莫之侮。我聖民。莫虐待。我先知。慎毋害。降彼土。以饑饉。民惶惶。精糲盡。有一人。名若瑟。預遣之。到埃及。初作奴。被桎梏。實聖意。試忠懲。鍛鍊畢。蒙開釋。彼大王。民之辟。命若瑟。任平章。理萬幾。御親王。諸長老。列門牆。時義塞。入斯邦。衆天民。寄於邯。未幾時。我滋繁。庶且富。強於敵。敵懷妒。弄詭譎。主鑒此。道每瑟。簡亞倫。相吾國。於邯地。樹標幟。向衆敵。彰靈異。降晦冥。徧地黑。主之命。孰敢逆。川變血。魚不活。蛙成羣。侵宮室。蠅無數。虱充斥。下冰雹。降烈火。毀葡萄。損衆果。主一言。飛蝗至。又蚱蜢。不可計。蔬與黍。盡被食。彼國人。喪冢息。主導我。出災域。攜金銀。離埃及。我支派。皆康強。非埃及。所能當。見我出。喜欲狂。主張雲。庇我行。夜作火。照吾民。應民求。集鵲鴉。降天糧。實其腹。裂磐石。出噴泉。沙磧地。成清川。主永懷。夙所言。亦未忘。鼻祖賢。主親領。我百姓。使天民。咸相慶。列邦地。我得承。我何功。獨蒙恩。主爲此。豈無因。欲吾族。守聖法。勉之哉。慎毋忒。

第百有六首 民之不淑

可懷惟主。肫肫其仁。慈恩不價。萬古和春。

主之偉蹟。誰能盡述。美德如海。難以蠡測。
守正不移。必膺多福。爲善有恆。斯人常樂。
惟彼聖民。慈主所憶。求主憐我。廁彼之列。惠然來臨。賜以拔擢。俾我親沾。天民之福。俾我同享。帝族
之樂。爾國發榮。吾心乃足。

吾與列祖。一丘之貉。心跡未清。懷邪作惡。憶昔吾祖。客居埃及。不悟靈異。不念大德。紅海之濱。肆行
叛逆。我主忍之。仍予救拔。以保令名。以彰神力。呵叱紅海。厥水立竭。俾民得濟。如行沙磧。保之於仇。
脫之於敵。海水復合。羣敵盡溺。乃信聖言。乃歌顯績。不久卽忘。慈訓不恤。纔得安寧。便恣淫佚。率彼
曠野。惟求口實。姑應其求。賜以美食。形體日肥。心靈日瘠。復在營中。嫉妒每恣。特彼亞倫。天縱之哲。
彼大男者。實爲巨猾。大地頓開。將彼吞滅。僻賴之黨。亦葬地窟。煙騰火發。悉焚餘孽。若輩鑄憤。於彼
何烈。五體投地。禮拜斯物。竟以牛像。替彼尊極。夫牛何靈。惟草是齧。遽忘恩主。威靈顯赫。震威敵邦。
耀德卽域。紅海之事。應猶歷歷。哀哉冥頑。獨不知億。我主用是。大震霹靂。若非每恣。爲之緩頰。彼代
之人。久矣絕跡。

惡性難改。罔悛於心。藐視樂土。不信佳音。心怨口謔。弁髦良箴。主乃發誓。傾覆頑強。使於曠野。終身
徬徨。子子孫孫。羈旅異邦。散處各地。欲歸無鄉。

斯民之罪。不可勝計。遂物移意。耽心淫祀。奉事死神。食其所祭。復以汚行。觸忤雅瑋。激主震怒。降以疫癘。菲尼哈者。乘時崛起。納民軌物。厥災以止。中流砥柱。千古稱義。

風波之地。民亦忤主。每瑟受累。實爲彼故。爾時民衆。向主跋扈。每瑟遑急。言有失度。

雅瑋有命。敗類是鋤。非惟不從。且與雜居。習其異端。同流合污。供其偶像。甘作其奴。犧牲子女。子女何辜。忍流其血。以媚惡魔。迦南之地。實爲蟻窠。穢氣冲天。邪淫實多。大主發怒。厭惡斯族。奪其獨立。托命他國。令彼仇人。爲其君牧。仇人逞威。肆其凌虐。頻蒙救拔。依然怙惡。哀哉斯民。自求荼毒。窮極呼主。主聞其哭。天心實慈。愍其窘蹙。追念宿盟。不爲已甚。愷彼敵人心懷惻隱。

求我恩主。拯救吾人。自彼列國。集吾流氓。俾得完聚。共誦聖名。以爾美德。爲我光榮。

可頌惟主。義塞之宰。振古如茲。乃至萬代。願爾兆民。同心愛戴。

聖詠 卷五

第百有七首 人窮返本

浩浩其天。淵淵其淵。心感我主。仁澤緜緜。誰宜詠此。普天羣賢。羣賢伊何。主所矜全。蒙主救贖。脫身
凶惡。自東自西。自南自北。祁祁衆聖。無思不服。相聚而歌。抒其心曲。

或遊窮荒。迷途徬徨。熒熒征魂。撫影自傷。載飢載渴。欲歸無鄉。山窮水盡。惟求主恩。花明柳暗。引入
芳村。可不稱謝。大仁大能。慰我飢渴。錫我溫存。

或作幽囚。銷魂獄中。黑影幢幢。鏈鎖重重。不敬天命。遭此鞠凶。援手無人。憂心忡忡。悔罪籲主。拯其
厄窮。忽然開朗。天地一新。主實垂憐。枉捨脫身。可不稱謝。大能大仁。銅門鐵檻。粉碎如塵。

或陷昏迷。積辜成疾。雖有珍羞。亦焉能食。戚戚嗟嗟。日與死逼。宛轉病榻。惟存喘息。哀哀求主。賜其
康復。憑主一言。克獲勿藥。主言洵奇。生死肉骨。可不稱謝。再造之恩。可不獻祭。慶此更生。

或航大海。依水爲生。於彼洋洋。日擊大能。但一起意。風掀浪翻。升如冲天。降若墜淵。踉蹌瞑眩。有如
醉顛。雖有智巧。何以自全。情急求主。轉危爲安。狂風懾威。噤若寒蟬。駭浪順命。靜如蠶眠。既經風波。
彌甘安恬。卒賴帝力。泊彼岸邊。可不稱謝。大慈大猷。宜向老幼。揚主之休。

頑民怙惡。主心不悅。變川爲沙。泉源枯竭。膏腴之地。倏成磽瘠。咎實自取。鹵莽滅裂。窮民號飢。主心愍之。開石爲泉。沙漠成池。俾建城邑。安居樂業。良田多稼。葡萄徧植。春播其種。秋登其實。百穀既豐。六畜蕃殖。庶矣富矣。僑游化域。

主德蕩蕩。無偏無黨。憎彼侯王。黜之遐荒。遐荒無路。四顧茫茫。寢削寢弱。淪胥以亡。恤此寡弱。錫以寧康。靡暴於衆。無凌於強。子孫振振。多於羣羊。民生裕哉。如熙春陽。賢者觀此。相顧怡悅。不肖觀此。相顧結舌。哲人觀此。會心玄德。

第百有八首 絃歌迎曉

神樂蘊心。頌聲發唇。昧爽鼓瑟。喚醒清晨。謝主之德。詠主之恩。以傳萬國。以告生靈。大仁塞宇。高義薄雲。峻極於天。光耀乾坤。

祈爾賜佑。祈爾垂聽。引手拯拔。爾之所親。

大主有命。吾心用樂。將分隰岑。將據疎谷。基列西蒙。莫匪我屬。法蓮爲屏。樹德爲牧。摩瓦充飾。夷東置屨。菲蒨之野。供我歡躍。

誰能領我。襲彼崇墉。誰能引我。征彼夷東。我主胡爲。棄我泥中。我主胡爲。不護我戎。縱有人助。何以爲功。求主相我。克彼元凶。既有神助。吾氣則雄。主必佑我。消滅敵蹤。

第百有九首 自作孽不可活

吁嗟我所天。無然守緘默。羣小張讒口。向我弄詭譎。惡言紛相加。無故肆抨擊。愛之反見怪。吾禱何曾息。將讐報我恩。以怨酬我德。願彼昧良者。自身遇健敵。黃雀逐螳螂。循環相磨折。願彼受判時。獲其所應得。願彼虛僞禱。轉增其罪責。願彼遭天伐。他人繼其職。子女爲孤兒。嫠婦歎空室。兒孫作流氓。行乞於異域。家業被拼吞。外人食汗血。生前無人憐。死後不見恤。世系卽見斬。姓名被塗抹。願其父母罪。常爲主所憶。沒世而無聞。影蹤歸沈寂。平生懷刻薄。好乘人之急。欺壓傷心人。窮民供殘殺。彼旣愛呪詛。呪詛應蜚集。彼旣惡祝福。百福應遠逸。自以詛爲服。斯服何由脫。如水亦如油。浸心復沁骨。衣帶重重束。誰能解其結。含血以噴人。報答在朝夕。求主爲聖名。秉公伸我屈。求主按仁慈。賜我以救拔。我今處困境。中心傷欲絕。吾生如暮景。翳翳慘將入。身世同飛蝗。飄飄無寧息。齋久雙膝軟。肌膚不復實。見者皆搖首。我成衆矢的。惟望我恩主。援手昭慈愷。務使世間人。咸觀爾神力。任憑人謗詛。但求主輔翼。若輩終承羞。爾僕應怡悅。行見吾諸敵。被辱且蒙恥。我欲揚洪恩。當衆獻頌美。誰救窮困者。其惟主雅璋。

第百有十首 君子道長

天主語吾主。安坐我右邊。俟我爲爾克諸敵。令彼俯伏爾足前。主必自西溢。授爾以天權。統治爾敵

人子民咸將心悅誠服。獻其身。佩德以爲飾。共熙光天與化日。爾稟平旦氣。芳露所滋潤。主已立誓。豈能悔。爾當永爲司鐸第一品。與彼麥基德。職位相彷彿。佑爾之主震霹靂。世之君王被痛擊。彼將鞠全世。屍體遍大地。元惡大愆既被夷。主乃逍遙路上飲清溪。正道擡頭邪道微。

第一百一首 知與行

一心感大德。歌誦聖會中。功德實浩蕩。諦觀樂無窮。經綸既煌煌。仁義亦源源。聖蹟堪永懷。聖心乃慈淵。眷戀虔誠者。恆念夙所言。兆域付天民。德威信無邊。所行真且善。所言可實踐。言行俱正直。千秋永不變。救贖恩既殊。盟約成經典。聖名可不敬。慈德可不戀。人能畏眞宰。妙慧卽在斯。聖誠宜篤行。能行始有知。可頌惟雅琚。流芳無窮已。

第一百十二首 闡然日彰

敬主無懈。樂道不倦。福哉斯人。聖心所眷。
積善之家。必有餘慶。潤身潤屋。子孫克昌。溫溫恭人。曖曖含光。慷慨好施。扶弱抑強。福哉斯人。終身無殃。典型常在。萬世流芳。
厥心堅固。惟主是怙。雖聞凶音。無有恐怖。惟其無畏。知敵必潰。平生疏財。積德累累。宜其挺秀。鬱鬱其穗。

不肖觀之。怒目切齒。切齒何爲。胡不遄死。身敗名裂。何苦出此。

第一百十三首 矜貧恤寡

願雅璋之兼僕兮。咸讚恩主。昉自今日兮。以逮永古。頌主之名兮。朝朝暮暮。高高在上。監臨萬民。威鎮寰宇。光耀天廷。蕩蕩乎其不可象兮。莫之與京。獨屈尊而紆貴兮。垂視乾坤。拯貧寒於糞壤兮。拔焚獨於泥中。使與王侯兮並駕。與牧伯兮比降。又使不妊之婦兮。安居從容。竟成多子之母兮。其樂靡窮。

第一百十四首 解放歌

迦自義塞出埃及。雅谷宗室得獨立。樹德成聖所。義塞爲聖域。紅海爲之不敢潮。約但倒流萬頃濤。大山踴躍如牡羊。小丘紛舞如羣羔。

借問紅海胡爲不敢潮。約但胡爲遼逡逃。大山胡爲躍如羊。小丘胡爲舞如羔。雅谷之主臨大地。大地亦戰戰孰能泰然無動真宰前。曾變沙磧爲良田。頑石化爲活泉水。主之德威信無邊。

第一百十五首 真宰與偶像

非爲吾人兮爲主。願主顯揚兮聖名。證爾之仁兮長存。昭爾之信兮有徵。莫令異邦兮驕泰。曰彼之主兮安在。誰知吾主固在九天之上兮。行其心之所愛。豈同若輩手製之偶像兮。乃金銀之所成。口

不能言。耳不能聽。目不能視。鼻不能聞。手不能握。足不能行。雖其喉舌寂寂無聲。是知造像者固麻木而不仁矣。而信奉之者又安得而非冥頑不靈者乎。嗟吾義寒之族兮。當有異乎是度。嗟吾亞倫之苗裔兮。應惟主之是怙。嗟爾普世之聖徒兮。咸應仰賴永生之主。既無間義寒與他族兮。亦不分別貴賤與貧富。惟天主之無偏袒兮。歸斯受之。苟中情其悅服兮。主必佑之。既潤爾身兮。亦昌爾後。須知主乃眞宰兮。締造天地。天爲主之天兮。而授人以塵世。夫彼麻木而不仁兮。焉能讚主。何吾人之僥倖兮。得頌美以終古。

第一百十六首 報主願

中心愛天主。主已聞我訴。既蒙主垂聽。終身申誦慕。曩日罹危難。羅網周圍布。憂心信如結。性命瀕陰府。竭聲呼主名。除主復誰怙。雅璋惠且信。慈悲充臟腑。帝蒙被仁育。小子承恩撫。既爲主所眷。吾魂復何怖。息爾惶惶意。安心依大父。大父待小子。恩澤豈不富。脫我於萬死。扶我目中淚。殷勤相扶持。令我無跌墜。虔將餘生獻。翼翼承甘旨。

昔在患難中。自言陷絕境。世人皆虛僞。無一堪置信。此言出倉卒。心實未絕望。備承主之惠。盛德何以償。惟願接恩杯。恆頌主名芳。勉行報主願。宣德於萬方。我主待聖徒。猶似掌上珠。其生固足珍。其死價尤殊。殷勤啓吾主。我乃爾之僕。爾僕誰家子。出爾婢女腹。我今獲自由。主實解其縛。敬獻謝恩

祭。恭祝聖名芳。欲償報主願。宣德於萬方。讚主在何處。宜在主之堂。咸集瑟琳城。暢揚主恩光。

第一百十七首 仁與誠

普世誦恩。萬民謳德。仁育無邊。至誠不息。

第一百十八首 進行曲

啓行時吟

稱謝至尊。肫肫其仁。慈恩不匱。萬古和春。
歌哉歌哉。義塞之民。慈恩不匱。萬古和春。
亞倫之裔。鼓爾歌脣。慈恩不匱。萬古和春。
諸凡虔誠。一口同聲。慈恩不匱。萬古和春。

進行中吟

昔罹患難。惟主是求。蒙主垂聽。我獲自由。
主作我保。我復何憂。敵人謀害。亦焉能酬。
願我同人。敬主之休。相彼頑敵。終必蒙羞。
可庇惟主。爲我岑樓。悠悠人寰。無可依投。

可庇惟主。爲我岑樓。誰能依托。世之君侯。
萬民洵洵。環我四周。我恃主名。粉碎諸仇。
萬民洵洵。圍我周市。我恃主名。迎頭痛擊。
萬民洵洵。勢如羣披。我恃主名。驅之絕蹤。
萬民洵洵。勢如燎火。我恃主名。克消厥禍。
邇人咄咄。意我必墮。爾亦徒勞。主實全我。
主乃我德。入我歌詞。主是我福。中心好之。
善人承恩。雍雍怡怡。歌樂之聲。透其簾帷。
主之右手。大施神奇。主之右手。拯我於危。
主之右手。能作能爲。我既得生。宜宣主威。
主之愨我。尤其厲矣。未至於死。亦其慈矣。

民衆之首領至門前吟

爲我洞開。正義之門。納我入殿。頌主之恩。

祭司從門內應

雅璋之門。義者可入。

首領進門時吟

蒙主垂聽。可不頌德。吾生何幸。長沐芳澤。梓人所棄。竟成隅石。

祭司吟

主之所爲。神妙莫測。

民衆進殿時吟

良辰美景。乃主所設。濟濟一堂。歡愉何極。求我雅璋。賜我安逸。求我恩主。加以百吉。

祭司對首領吟

爲主而來。應蒙多福。我自聖宅。祝爾康樂。主是真神。靈光耀目。

祭司對民衆吟

好將祭牲。繫諸壇角。

民衆吟

敬向我主。披我心腹。欽哉雅璋。皇皇穆穆。

齊吟

稱謝至尊。肫肫其仁。慈恩不匱。萬古和春。

第一百十九首 道學津梁

聖詠 聖經初編 卷五

一、正心誠意

樂只君子。心地純潔。遵行聖道。兢兢業業。優哉游哉。順主之則。惟精惟一。無忒無忒。聖誠彰彰。寧敢
荒逸。祈主導我。虔守大法。庶幾無愧。金科玉律。俾得暢詠。主之靈騁。正心誠意。惟主是式。但求吾主。
莫我棄絕。

二、立志學道

嗟爾青年。何以潔身。其惟立志。聖訓是遵。一心仰主。守命惟勤。恆將法度。藏之於心。惟恐獲罪。有忝
洪恩。可頌惟主。教我明經。俾我唇舌。述爾諄諄。悅懌爾言。勝似金銀。潛心妙理。瞻仰典型。心歌腹詠。
咀華含英。

三、宅心知訓

福佑小子。加以慈愍。有生之日。誓遵爾命。發我之矇。宅心知訓。吾生如寄。踪跡靡定。示我大道。俾識
途徑。永慕典章。如渴思飲。固知天心。疾彼頑梗。頑梗伊何。弁髦明令。我既守法。常免困窮。權貴相逼。
我惟守正。可師惟禮。怡養吾性。

四、擇善固執

吾命瀕危。將轉溝壑。祈保吾身。依爾所諾。鑿我丹忱。教我大法。開我明悟。會心玄德。憂心欽欽。祈賜

慰藉。示以真道。庶遠邪說。耿耿予懷。擇善固執。居仁由義。應免隕越。發憤守誠。自強不息。祈主使我。心冲體逸。

五、從容中道

虔求吾主。迪以聖謨。俾我祇遵。始末不渝。賜我真慧。守誠有孚。心乎愛矣。行自中矩。願主指導。當行之路。務使小子。景慕法度。內有足樂。奚羨財富。去華崇實。莫使外驚。道中之趣。令我恆懷。修省恐懼。雪我恥辱。莫令受侮。典章炳煥。我心所慕。賜我生命。昭爾恩祐。

六、守正不移

依爾金諾。賜我仁育。俾向讒人。知所答覆。爾之慈訓。吾命所托。爾之聖誠。吾望所屬。惟願我口。常宣金玉。一息尙存。守命惟篤。優游聖道。恢恢綽綽。庶在王前。申我謬謬。直陳正理。不致屈辱。正理之外。寧有他樂。典章常懸。可以仰矚。耳濡目染。燠我心曲。

七、自強不息

聖道煌煌。吾心所望。雖在顛沛。寬慰愁腸。常飲活泉。令我自強。任彼驕人。逞其猖狂。我行我素。守誠無荒。永懷古道。樂此綱常。羣小離主。我心憂傷。我生斯世。如客他鄉。他鄉寡歡。惟樂典章。卽在暮夜。未嘗或忘。一生順命。胡云不臧。

八、心跡雙清

於穆雅肆。爲我乾坤。從容中道。亦自溫存。一心求主。賜以洪恩。翼卵鳴伏。踐爾前言。遊心玄德。托足聖門。遵主大路。載欣載奔。愠於羣小。彌懷春暄。中夜獨興。稱謝至尊。稱謝云何。愛爾明箴。敬主之人。爲我良朋。感爾仁育。大地歡騰。求主教我。諸爾德音。

九、玉我於成

巍巍我主。言出推行。祈賜真慧。酬我忠心。昔處順境。沈溺邪淫。既遭顛沛。玉我於成。仁主所爲。靡有不仁。祈承玉律。俾得遵循。傲人相誣。我懷良箴。相彼羣小。腸肥心昏。我獨樂道。怡怡欣欣。體會大法。端賴困屯。寶主之訓。勝於金銀。

十、日新其德

渺渺子躬。主所陶鈞。祈開明悟。體道日深。務使君子。因我歡欣。咸稱我主。不負丹忱。靈鷲無瑕。寶維真神。愛我以德。降災以懲。祈賜仁惠。寬慰吾心。固知我主。言出推行。不見慈愍。何以爲生。金科玉律。怡悅心魂。相彼羣小。無故相侵。我仍樂道。涵泳日新。惟願君子。與我爲鄰。君子伊何。守命惟勤。惟願我心。懷道惺惺。恃主不辱。保我令名。

十一、爲善有恆

吾魂盼主。怒如調飢。望眼欲穿。嗣音何遲。肌削色奪。如煙薰皮。造次顛沛。守道不移。吾生在世。復能幾時。豈其懲惡。渺茫無期。驕人設網。我跡是窺。心懷叵測。目無明規。主不見佑。我將何依。雖在泥塗。未棄禮儀。祈賜康寧。昭爾仁慈。俾我守誠。終身不回。

十二、至誠不息

帝德罔愆。終古乾乾。至誠不息。仁育無邊。締造大地。大地彌堅。綱常不變。維繫乾坤。普天率土。莫非爾臣。須臾離道。何以自存。道爲活泉。賴此以生。旣爲爾僕。當蒙救恩。洵洵羣小。欲害吾身。我惟學道。彼徒悻悻。萬物有涯。大道無垠。

十三、涵咀義理

我愛玉律。吟味終日。身體聖誠。令我明哲。微妙玄通。遠勝諸敵。會心大道。師長擊節。遵行宏範。智邁父執。棄邪從正。孜孜兀兀。主之心傳。寧容有忒。聖言有味。甘於芳蜜。正惟好善。疾彼邪僻。

十四、黑夜明燈

妙哉聖道。爲我靈燈。雖行闇地。亦見光明。永矢勿諼。堅守良箴。橫逆頻加。求主保身。自頂至踵。歸功恩神。朝不保夕。未忘諄諄。惡人設穿。我惟懷刑。仁宅義路。惟吾德馨。傾心於道。持之以恆。始末不渝。以慰平生。

十五、惟精惟一

二三其德。我所痛疾。吾愛大法。惟精惟一。以主爲盾。惟道是悅。傳語羣姦。莫近我側。容我安然。順主之則。祈主恩佑。莫令望缺。祈主扶持。莫令傾蹶。無道之人。應遭隕越。我主惟誠。無取詭譎。主棄惡人。猶如糟粕。小子覩此。心悅誠服。我體戰戰。實畏陰騭。

十六、克己復禮

鑒我忠愨。莫令受虐。驕人罔極。祈保爾僕。望眼欲穿。盼爾救贖。惟爾聖言。爲我正鵠。祈賜小子。寵恩優渥。教我以禮。用以自縮。示我大法。涵泳純熟。羣凶橫行。我主其興。吾心愛道。勝於黃金。金科玉律。靡有不純。覩彼無道。孰能無瞋。

十七、罔邪存誠

聖謨奇妙。中心所寶。反覆玩味。漸得其奧。振聵發矇。童蒙悟道。如飢如渴。慕爾大誥。盍一顧盼。加以矜憐。俾我承恩。廁身羣賢。根深柢固。信道彌堅。莫使謬和。長我心田。惡人相逼。求主矜全。俾我守法。恆承歡顏。羣小背主。我爲泫然。

十八、居仁由義

正直惟主。容斷公平。主之所命。惟義與仁。羣小叛道。我心如焚。聖誠純潔。可以怡神。雖在危厄。未忘

天經。爾義不匱。爾法惟真。雖遭百罹。典章是欣。帝德罔愆。順之則生。

十九、夙夜無懈

謁聲呼主。祈主見應。我欲發憤。守爾慈訓。如蒙見救。順命益勤。仰望爾道。昧爽而興。侵更歷夜。永懷德音。求主垂憐。昭爾慈仁。按爾典章。錫我康寧。相彼無道。惟惡是欣。但望我主。與我爲鄰。金科玉律。靡有不純。真宰所訂。終古不更。

二十、本末兼賅

鑒我阨窮。拔我泥中。未忘爾法。耿耿其忠。伸我之屈。贖我之躬。依爾聖道。脫我於凶。相彼羣逆。不懷大法。自絕於道。不可救藥。慈悲惟主。吾命所托。祈保小子。依爾之諾。吾敵何多。恣其凌虐。吾乃兢兢。守命彌篤。一見羣小。令我不樂。日無法紀。背理縱欲。我之所愛。惟在聖誠。祈主開恩。予以覆載。我愛聖法。聖法罔愆。規模弘遠。條理井然。

二十一、和氣愉色

世之權貴。咄咄相過。吾心所畏。惟主之律。樂主之道。勝於財帛。深惡邪妄。獨愛正直。瞻仰道統。日七其頌。樂道之人。和氣內蘊。有倚何蹶。有恃無恐。小子平生。惟望主恩。兢兢業業。聖誠是遵。煌煌法度。怡懌心魂。守法無懈。懷訓有恆。規行矩步。對越天君。

二十二 默識心通

願我呼籲。上達宸聰。依爾之言。命我明通。垂納我訴。濟我於窮。教我昏舌。讚揚仁風。默識微言。法度是從。求主扶佑。渺渺之躬。平生懷德。大道是宗。求主垂顧。酬我勤忠。俾藉慈訓。體逸心沖。我如迷羊。歧途徬徨。祈主導引。歸於牧場。鑒我丹忱。未忘典章。

第二百十首 不可與處

昔日罹危厄。籲主乃見脫。今日復求主。濟我於讒舌。讒舌毒於螫。殺人不見血。主將加何刑。方與厥罪稱。利箭集其身。熬炭澆其頂。

吾生何不幸。旅居於昧設。榮榮無所依。長作圻達客。

異心而同處。喧嘈增寂寞。和平我所愛。戰爭彼所樂。格格不相入。方枘而圓鑿。

第二百十一首 慈愛之主

舉目向青山。悠然望大顏。偉哉造物主。吾心所仰攀。有主作金湯。小子復何患。爾立主扶持。足跟誰能移。爾眠主守護。眷爾如嬌兒。佑爾無朝暮。更比慈母慈。慈母有時倦。爾主永不睡。朝日不爾害。宵月不爾祟。行藏勿難主。出入百無忌。盛哉主大德。慈恩永不匱。

第二百十二首 同心之言

良朋邀我上聖山。相偕入殿謁天顏。同心之言馨如蘭。

昔聞瑟琳名。今入瑟琳門。城廓完堅市容整。室居櫛比民相親。聖民各支派。義塞之子孫。按常例。上瑟琳。稱謝天主之洪恩。大維宗室之寶座。亦在斯京城。爾等皆應爲聖邑。祝昇平。愛戴聖邑者。百福萃其身。

我願和平常寓爾城中。百祥咸集爾諸宮。我爲親朋故。願爾安且固。更爲聖道故。祝爾庶且富。

第二百二十三首 延頸企踵

爲盼天上主。向天頻仰首。猶如彼僮僕。常看東翁手。猶如婢女目。恆在主婦肘。吾目亦視主。望主頒恩佑。主其加矜憐。受垢亦已久。旣爲富人笑。更被驕人呪。

第二百二十四首 烏脫樊籠

惟願我義塞。向主披心臆。若非雅璋在我側。敵人勢烈烈。吾儕早應被吞滅。洪濤洶湧狂瀾奔。大水駸駸沒吾魂。賴主佑。身得存。未爲敵人所犧牲。焉能不感再造恩。

吾魂如小鳥。已脫佃者羅。羅網已破吾得逸。佃者雖多如我何。仰恃天地之主宰。旣有神助誰能害。

第二百五首 代虐以寬

依主之人。安如西溫。催乎不拔。終古長存。

穆穆瑟琳。羣山園之。雍雍聖民。慈主衛之。防自今茲。乃至世世。暴虐之政。不可終日。豈容匪類。亂斯聖域。誠恐良民。受其熒惑。祈我雅璋。福彼善人。善人無邪。心地光明。舍其正路。轉入歧途。當與羣逆。同伏其辜。庶幾義塞。安謐無虞。

第百二十六首 耕耘與收穫

昔主挈衆伴。安然返聖地。吾儕當是時。驚喜同夢寐。心中饒甘味。舌端宣歡意。我主施聖蹟。列邦亦驚異。我主大作爲。實令我心慰。我今求我主。續引吾民至。源源歸故鄉。猶如南流水。錫彼收穫樂。儼彼耕耘淚。去時皆嗚咽。含淚播種子。來時應怡怡。帶笑刈嘉穗。

第百二十七首 心廣體泰

微主建爾屋。建屋徒自苦。微主守爾城。守城豈能固。擾擾復擾擾。孜孜度晨昏。究竟何所得。愁苦供盤飧。小人長戚戚。君子坦蕩蕩。心安身亦泰。美睡主所賞。有子萬事足。無營胸襟廣。壯士手中箭。青春膝下兒。蓄箭須滿囊。結子須滿枝。同心而協力。出門誰敢欺。

第百二十八首 善人福報

敬主邀天樂。從容聖道中。勤勞應有果。君子豈終窮。

妻比葡萄樹。葡萄結滿廊。麟兒紛繞膝。和氣溢門牆。
惘惘寧無報。西溫與汝親。平生濡帝澤。長樂瑟琳春。
積善有餘慶。兒孫世世芳。和平臨義塞。國泰民斯康。

第二百二十九首 屋巔草

嗟我義塞族。自幼多顛沛。外患實類仍。所幸未崩潰。敵人何猖狂。扶犁耕我背。犁溝深且長。凌虐亦云備。公正惟天主。強項應手碎。茲爾仇西溫。焉能不傾否。猶如屋巔草。未秀先枯萎。采之不盈掬。束之不盈袂。棄置道路邊。見惡如垢穢。行人不祝福。天主豈賜惠。

第三百十首 懺悔吟之六 得且

我自窮幽。主不休。主其傾耳。俯聽我求。天下之人。誰無罪尤。主若深究。孰能無憂。
惟主寬仁。不絕自新。悠悠人世。可不尊親。
我心遑遑。惟主是望。望主一言。慰我愁腸。
長夜漫漫。惟主是盼。盼主不至。坐以待旦。
我告義塞。望主莫怠。肫肫其仁。救恩似海。誰贖爾罪。厥惟真宰。

第三百一十一首 天真

我心如小鳥。毛羽未全豐。不作高飛想。依依幽谷中。
我心如赤子。乳臭未曾乾。慈母懷中睡。安恬凝一團。
曷哉吾義塞。飲水輒思源。世世承流澤。莫忘雨露恩。

第百三十二首 結約之權

憶昔大維。勞心焦思。惘惘款款。主其念之。曾向雅璋。懇切起誓。必爲吾主。物色勝地。以設闕幃。以安法櫃。主無安宅。誓不回第。不願登榻。不遑假寐。風聞法櫃。在彼以法。我覓得之。於彼林邑。爰入其所。向主撫臆。求主興起。移爾駐蹕。俾爾及櫃。俱得安息。使爾司鐸。佩德爲裳。使爾諸聖。誼愉洋洋。追念大維。福佑元良。既允大維。主寧能忘。爾之家息。必得爲王。苟爾來胤。咸守綱常。兢兢業業。遵我典章。當賜康樂。國祚無疆。

聖心所鍾。實在西溫。樂此美土。可安吾神。必使聖域。歲慶豐登。與與百穀。以慰饑民。溫溫司鐸。聖德飾身。邠邠天民。齊騰歡聲。大維之裔。頭角崢嶸。爲我元良。永燃明燈。諸敵蒙辱。彼獨長榮。

第百三十三首 和樂且湛

弟兄同居樂無涯。渾似靈膏沐首時。靈膏流浹亞倫鬚。直下浸潤亞倫禡。又如黑門山上露。降於西溫芳以飴。君不見西溫山。主所喜。永生泉。福履綏。

第三百三十四首 昏定

啓終宵守主宅。善哉主之僕。願爾常誦芬。舉手向靈幄。
應願主自西溫。介爾以景福。天地與萬物。莫非主所作。

第三百三十五首 造物與受造

善哉主之僕。咸誦主之名。肅肅守主宅。雍雍立主庭。詠主之仁德。挹主之芳芬。雅谷膺主選。義寒承主恩。大德惟我主。浩蕩邁百神。隨意造萬物。品類紛以陳。天地與淵海。咸賴主陶鈞。騰霧於地極。運霆作甘霖。大風何所自。實出雲雷屯。降災於埃及。人畜喪家息。法老及諸臣。紛紛伏威烈。強國被痛擊。斯君受殲滅。亞摩王西宏。巴珊王曰噩。迦南之諸侯。靡不嬰顯戮。宗室既淪亡。疆域授吾族。吁嗟主雅璋。芳名長卓卓。主將鞠其民。忠僕當蒙擢。

異邦之偶像。乃爲金銀器。明明是死物。人工之所鑄。有口不能言。有目不能視。有耳不能聽。鼻觀了無氣。凡鑄偶像者。將同偶像死。供奉偶像者。亦是偶像類。但願義塞族。一心懷雅璋。亞倫與利未。頌揚主德偉。舉世敬主者。咸應獻頌美。西溫與瑟琳。永爲主所位。主居聖殿中。於穆盍有已。

第三百三十六首 敘德辭

啓稱謝至尊。肫肫其仁。應慈恩不價。萬古和春。

啓歌頌眞宰。百神之神。

應慈恩不匱。萬古和春。

啓皇矣雅璋。萬君之君。

應慈恩不匱。萬古和春。

啓經綸無數。靈異日新。

應慈恩不匱。萬古和春。

啓憑其眞慧。締造天廷。

應慈恩不匱。萬古和春。

啓洪濤之上。展布乾坤。

應慈恩不匱。萬古和春。

啓匠心獨運。靈光紛呈。

應慈恩不匱。萬古和春。

啓何以御晝。實憑大明。

應慈恩不匱。萬古和春。

啓何以御夜。惟月與星。

應慈恩不匱。萬古和春。

啓懲創埃及。於恤天民。

應慈恩不匱。萬古和春。

啓領我義塞。脫彼劫塵。

應慈恩不匱。萬古和春。

啓主之手臂。實具大能。

應慈恩不匱。萬古和春。

啓但一舉手。紅海中分。

應慈恩不匱。萬古和春。

啓俾我義塞。魚貫而行。

應慈恩不匱。萬古和春。

啓海水復合。法老喪身。

應慈恩不匱。萬古和春。

啓引我登陸。平沙無垠。
啓世之牧伯。受主痛懲。
啓赫赫侯王。紛紛伏刑。
啓亞摩之君。名曰西宏。
啓巴珊王。遣赴幽冥。
啓固有疆域。歸我所承。
啓惟我義。實主之臣。
啓昔見衰削。今慶復興。
啓寇盜攝威。不敢再侵。
啓主以日糧。惠我生靈。
啓上天之主。可不尊親。

應慈恩不價。萬古和春。
應慈恩不價。萬古和春。
應慈恩不價。萬古和春。
應慈恩不價。萬古和春。
應慈恩不價。萬古和春。
應慈恩不價。萬古和春。
應慈恩不價。萬古和春。
應慈恩不價。萬古和春。
應慈恩不價。萬古和春。
應慈恩不價。萬古和春。

第三百三十七首 憶昔

憶昔淹留巴比倫。河濱默坐泣西溫。
白楊枝上挂靈瑟。遙寄鄉思到帝村。
敵人戲弄恣傲謔。勸我謳歌一笑呵。
身作俘囚淪異域。誰能含淚唱鄉歌。

一心惟戀瑟琳城。雖落他邦未失貞。倘使鳴彈媚仇敵。手應絕藝舌吞聲。
猶憶瑟琳遭難日。夷東蠻子競相呼。摧殘聖邑方爲快。祈主毋忘作孽徒。
巴比倫人恣劫奪。可憐稚子亦遭殃。誰能一雪斯奇恥。聖澤潤身萬古芳。

第三百三十八首 道與名

感激湧心府。詠主衆神前。穆穆朝聖殿。將爾聖名傳。爲實生光輝。慈德何淵淵。聖名固已弘。聖道更無邊。

昔日罹思難。恃主得平安。充我浩然氣。令我心彌堅。百王應頌主。感主諄諄誨。歌詠主之道。歸榮於雅璋。高高無與比。謙謙獨蒙憐。驕者終被抑。傲人遭棄捐。吾雖處困厄。知主必相援。保我於凶敵。解我之倒懸。慈恩徹始末。心願賴成全。前功寧可棄。初月豈無圓。

第三百三十九首 主之全知

明哉雅璋。獨幽洞微。詣我起居。鑒我秘思。行藏出處。明察罔遺。心聲未發。主已先知。瞻之在前。忽焉在後。聖手所指。不離左右。主之全知。超絕萬有。不可思議。矧可詰究。神彌六合。靡所不包。聖顏善照。何所用逃。曰躍於天。主在雲表。曰潛於淵。主伏於沼。日出之鄉。遼海之濱。聖臂所及。猶若比鄰。莫謂暗室。靈鑒無形。莫謂暮夜。神聽無聲。

我之有生。亦云奇矣。主之大能。無與比矣。臟腑森然。主實型之。胚胎母腹。主實甄之。魂魄潛結。主實成之。

吾未成形。主已洞察。未見天日。先註歲月。主之蘊奧。神妙莫測。主之微旨。不可勝述。假曰計之。多於沙粒。寤寐思之。恍然自失。

惟願我主。殲彼不肖。惟願我主。除彼凶暴。彼何人斯。誣蔑大誥。自絕於主。孰敢愛好。與主爲敵。斯讐必報。不共戴天。疾彼無道。

惟願天主。鍛鍊我心。去我邪妄。指我迷津。俾遵大路。直達永生。

第四百十首 因果

求主拯我。於彼巨猾。求主脫我。於彼暴虐。窮兵黷武。心存險惡。舌如蠶尾。口含荼毒。求主出我。於彼掌握。扶我翼我。莫令失足。羣姦洶洶。設罝持索。羅網密布。機埒暗伏。處心積慮。圖我顛覆。我白雅瑋。爾爲我主。求爾傾耳。聽我哀訴。醫我小子。惟爾是怙。臨陣之日。每蒙庇護。莫容羣小。橫行無度。莫容惡計。暢遂無阻。恐長其傲。揚揚闊步。

相彼惡黨。信口詛咒。願其所言。悉歸自受。雷擊其頂。火燒其身。沉溺深淵。永不再興。大地雖廣。不容讒人禍之。逐惡如影隨形。多行不義。何以自存。大公惟主。屈者以伸。窮苦無告。是恤是矜。豈弟君子。

常懷主名。光明正大。對越天君。

第四百四十一首 擇交

殷勤籲天主。慰我引領望。向主獻心禱。宛如薦馨香。舉手抒仰慕。應同晚祭芳。守我口如瓶。防我意如城。莫使私欲萌。閑邪存我誠。教我遠羣小。不屑嘗其珍。寧受賢人責。苦口是良藥。莫受惡人諛。蜜中合辛螫。任憑彼作惡。吾禱終不輟。大愆既伏辜。當知吾言哲。

我今處危厄。時時虞隕越。吾目惟望主。莫令吾命絕。敵人設羅網。祈主賜輔翼。務使張網者。紛紛自墜入。

第四百四十二首 聖道中自有乾坤

竭聲向主籲。殷勤向主訴。敬將事實陳。直把丹忱吐。小子落魄日。惟主知其略。吾路一何險。羅網密密布。倉皇顧我側。舉目無所親。孤身罹危厄。無人問死生。長跪白我主。惟主可庇身。茫茫塵海裏。主是我乾坤。我今處絕境。顛沛亦已甚。羣小相窘辱。其勢一何猛。求爾應我禱。求爾加慈愍。拯我於諸敵。脫我於陷穽。俾我獲自由。宣揚爾德盛。務使敬主者。聞風共相慶。

第四百四十三首 懺悔吟之七

求主聽我禱。傾耳納我訴。依爾真與善。俯允我所籲。勿究我之罪。求爾賜寬恕。凡屬血氣倫。誰能無

忝主。敵人正相逼。我命逐塵土。猶如陳死人。寂寂度長暮。奄奄存喘息。心魂無寧處。凝思憶曠昔。默念主舉措。望天舉雙手。寫我心中慕。我心如旱田。望主施甘雨。俞允莫遲遲。應憐我情苦。主若掩慈顏。匍匐將誰怙。靜候主好音。長夜豈無曙。一心惟盼主。指我當行路。拯我脫諸仇。所賴惟神助。爾乃吾主宰。教我遵爾諭。導我以聖神。從容行中矩。賜我以生命。爲爾聖名故。拔我出困厄。徵爾言有孚。消滅我諸仇。著爾慈恩富。莫使爾臣僕。長受羣小侮。

第四百四十四首 新秩序

雅璋我磐石。可頌惟有爾。教我手能戰。指揮悉如意。主是我恩保。主是仁惠淵。敵樓兼寶塔。吾身賴以全。吾邦承主佑。上下咸相安。何物渺渺身。乃蒙主垂青。何物塵世子。乃蒙主關心。人生如夢影。歲月同浮雲。浮雲瞬息逝。踪跡不可尋。大主駕雲降。衆嶽皆噴煙。霹靂驅諸敵。雷霆磔凶頑。引手濟吾溺。全我於夷蠻。夷蠻無信義。所言惟欺謾。我欲奏新曲。向主撫十絃。百王所仰恃。大維賴以全。敵人何詭詐。無風起波瀾。求主佑小子。安然脫其樊。

願使我子孫。萌蘖成。大樹。女子閉坤範。堪充宮中柱。倉廩盈欲溢。百穀有餘貯。牛羊滋蕃息。芸芸不知數。暮夜無穿窬。白日無遊鶩。街巷無誼囂。井然有秩序。安居而樂業。衆庶承雨露。

第四百四十五首 光天化日

一心崇吾主。爾乃天地王。日日誦爾名。永永不能忘。蕩蕩惟雅璋。眞宰豈有變。浩浩且淵淵。玄德不可方。大猷代代傳。聖名世世芳。靈異資默想。經綸何輝煌。衆人述天威。我亦詠堂堂。大慈宜永懷。正直當讚揚。寬仁不輕怒。慈悲縊心腸。博愛無私覆。萬物熙春陽。天地宣化育。諸聖誦恩光。欲令人世子。懷德勉忠良。王業大且久。垂統永無疆。濟窮更扶傾。慷慨救危亡。按時賜溫飽。用慰喁喁望。信手行布施。羣生慶豐穰。所行皆信實。所爲惟慈祥。不負有心人。神助在身旁。有求必見應。心願悉見償。逆主必受誅。順主歷不昌。惟願我歌聲。妙音發天香。惟願血氣倫。共慶化日長。

第四百四十六首 主之全仁

吁嗟吾心魂。讚主是天職。一息苟尙存。諷詠宜不輟。一日有生命。恆誦主之德。豈可委爾心。仰賴侯與王。若輩皆凡人。生命如朝霜。安能爲爾謀。自救且不遑。一旦絕其氣。杳如石火光。身體歸塵土。謀爲悉糝糠。

何如踵雅谷。仰主膺多福。彼乃永生主。衆望之所托。天地與萬物。莫非主所作。誠篤惟天主。始終由一轍。屈者必見伸。飢者必得食。瞽目藉復明。幽囚蒙開釋。高舉謙卑人。溫存遠行客。矜恤孤與寡。傾覆諸悖逆。

巍巍天地主。世世御寰宇。爲我告義塞。永申爾孺慕。

第四百七十七首 大地回春

虔誦主大仁。暢詠主大義。此事我所樂。盡善且盡美。復興我瑟琳。完聚我流亡。溫煖傷心人。庶續已斷腸。

衆星誰能數。惟主喚其名。巍巍不可狀。余知亦全能。扶持謙卑者。傾覆傲慢人。可不歌大德。鼓瑟復鼓琴。慈雲何瀉。沛然降甘霖。大地飡芳澤。山丘草木新。既以飼家畜。亦以慰飢禽。

戰馬徒有力。佳兵安足恃。戰馬與佳兵。皆非主所喜。所喜惟善人。翼翼承甘旨。瑟琳與西溫。莫忘爾主恩。主既堅爾城。又復鞏爾門。居民咸熙熙。四境安以寧。良田產美麥。衆庶樂豐登。

我主頒聖詔。風行徧地極。降雪如羊毛。灑霜似銀屑。隆冬下冰雹。誰堪此凜冽。號令方出口。凍結應聲融。春風釀淑氣。百川皆溶溶。

微意啓雅谷。玄謨示義寨。他族未有此。焉能明大法。

第四百四十八首 鈞天廣樂

讚主於天中。讚主於蒼穹。讚主爾衆神。讚主爾萬軍。讚主爾日月。讚主爾明星。讚主爾九天。讚主爾靈淵。讚主爲何因。莫非主所成。讚主爲何故。恃主得安固。各各有定分。祇守莫踰矩。

讚主於大地。讚主於海底。溟海與源泉。冰雹與氛氣。雷霆與白雪。飄風布聖旨。小丘與高嶽。果樹與

喬木爬蟲與飛禽。野獸與家畜。王侯與衆庶。權位與貴爵。壯男與閨女。白髮與總角。皆應誦主名。主名獨卓卓。峻德超天地。子民承優渥。衆聖所瞻仰。義塞所依托。天下諸虔信。莫非主之族。

第四百四十九首 暢行宿命

我願諸聖者。向主奏新音。義塞樂真宰。西溫慶其君。誦名表孺慕。萬舞寫歡欣。伐鼓布淵淵。撫琴抒殷勤。應知慈悲主。愛悅其子民。尤懋謙卑者。美德飾其身。諸聖可不樂。寤寐詠歡心。手執雙鋒劍。口宣諷誦音。竭忠施天誅。羣逆知所懲。世王被鏈索。冢臣加桎梏。暢行主宿命。此榮將誰屬。願爾諸聖者。款款致心曲。

第五百五十首 大小和鳴

讚主於聖所。讚主於天府。讚主之偉績。讚主之弘度。讚主宜吹角。鼓琴復鼓瑟。播發助萬舞。頌聲入絲竹。大鈸和小鈸。噌吰且鐃錯。願凡含生屬。讚主永不息。

附註

卷一 此卷除第一第二兩首舊序不載作者外。其餘皆稱大維所作。

第一首

(一)「百祥」原文本屬多數。若用英文則爲“O the happinesses of...”意謂各種福祉。無美不具也。而西洋譯本多忽略此點。僅用「福哉」字樣。殊嫌單薄。似不能充分表達原意。

(二)「聖道」原文爲 *Teologia*。通行譯本皆作「律法」。惟據經學家研究。此字不僅爲「律法」。實包括聖教全部道理。

(三)「涵泳」原文有念茲在茲。口誦心維之意。通譯「思想」或「思維」。似不能充分發其蘊義。

(四)「譬如溪畔樹」句。原文爲「譬如植於溪畔之樹」

(五)「歲寒」二字原文所無。

第二首 此詩預言耶穌基督。

(一)「寓歡樂於敬懼。」天主兼嚴父慈母於一身。故亦尊亦親。

(二)「心悅誠服以順命。」有本作 *King the non* (「與子親吻。」)本譯係根據最新公

教拉丁譯本。

第三首與第四首 乃大維避其子之背叛時所作。當時情勢極為危急。而大維不惟處之泰然。

抑且怡然自樂。非真心仰望天主者。曷克有此。聖保祿云：「吾人雖處危難。亦有至樂。」

第五首 「惟善故疾惡。」疾惡云者。非疾惡人。乃疾人之惡也。吾人若果愛人如己。則人之有善。若已有之。人之有惡。若已有之。孔子曰：「惟仁者為能愛人。能惡人。」張子橫渠亦曰：「惡不仁。故不善未嘗不知。徒好仁而不惡不仁。則習不察。行不著。是故徒善未必盡義。徒是未必盡仁。好仁而惡不仁。然後盡仁義之道。」

第六首 「日枯因愁多。骨消緣辱頻。」猶太詩中最喜用對語。對語可分三種。(甲)同義或平行。(乙)相反。(丙)相成。如「日枯因愁多。骨消緣辱頻。」「心中饒甘味。舌端宣歡意。」「呼人人不應。籲主主不顧。」「朝朝宣宏旨。夜夜傳微衷。」皆屬甲種。如「徒誇車馬力。敵人何夢夢。吾人恃主名。不與彼人同。彼皆仆在地。我立猶挺胸。」乃屬乙種。至於丙種。則兩句或兩句以上之意。有因果關係。或互相補充。例如「王求保其命。主錫無量壽。」「主為我牧。我乃

其羊。」主聞吾音兮宮中，哀聲上達兮宸聰。」

第七首

(一)「倘吾曾爲此。」此一字係指所誣之事由。

(二)「惡人如妊婦。臨岸時在卽。所懷惟禍胎。所產乃妖孽。」因果報應爲全部聖詠主要思想之一。此與印度及我國思想最爲接近。竊謂聖詠之人生觀。以敬愛天主爲之經。而以因果報應爲之緯。

第十一首 聖教之宗旨。在爲人類犧牲。不在求一己之安全。吾主耶穌有言曰。「天父所賜之爵。可不飲乎。」孔子亦曰。「鳥獸不可與同羣。天下有道。吾不與易也。」

第十二首 「白銀經七煉。」按照猶太思想。七爲完備之數。

第十六首 「方寸無他好。懷主以爲寶。」精神生活之關鍵。在於惟精惟一。此爲聖詠中首要教訓。故云「在天惟有主。在地無他樂。」(第七十三首)「愁思千萬緒。思主是一樂。」(第九十四首)或曰。若但愛天主。毋乃忽於人倫乎。殊不知能愛天方能愛人。聖若望書中有言曰。「凡孝其親者。亦必愛其親之所出。是故吾人苟愛天主而順其命。則必兼愛天主之子女矣。」

第十七首 「鄉愿生斯世。但爲斯世活。」竊謂但貴人爵。不貴天爵。此類之人。最是可憐。蓋耶穌有言曰。「應知人之所貴。正天主之所賤也。」（路加福音第十六章）周子濂溪亦曰。「夫富貴人所愛也。顏子不愛不求。而樂乎貧者。獨何心哉。天下有至貴至愛可求。而異乎彼者。見其大而忘其小焉爾。見其大則心泰。心泰則無不足。無不足則富貴貧賤處之一也。」

第十八首 「以逆報逆。」逆逆者順也。

第十九首 哲學家康德曰。「頭上滿天星斗。心中一片天良。常令人悚然悚然。不能自已。」此乃此詩之註脚。

第二十二首 此爲預言吾主耶穌受難之詩。

「主兮主兮。胡爲棄我如遺。」耶穌在十字架上曾念此句。原文譯音爲「伊理伊理。拉瑪沙巴大尼。」共有十音。故本稿亦譯成十字。

第二十三首 「引我澤畔游。」「澤畔」或譯爲「靜水邊。」或譯爲「可安憩的水邊。」茲據 M'Swiney 神父之研究。原文之意實爲 "Well-watered oases"。是即澤也。蓋巴力斯坦地多沙漠。偶見草澤。自爲羣羊所喜。

第二十四首 「嗟爾古戶。高爾閨閨。殷勤迎納。光榮之君。」此語具有象徵的意義。我中華亦

爲古戶之一。希望亦能高我閑閑。迎納天主聖道。

第二十七首 「仰主圖自強。」惟一心仰望天主。方能自強不息。欲能不能。

第三十首 「長夜悲泣。拂曉乃喜。」靈心生活亦有順境逆境。順時覺一帆風順。突飛猛進。逆時便覺窒礙難行。枯燥無味。殊不知此乃必經之路。用力既久。而一旦豁然貫通焉。苟不困心衡慮。斷不能臻圓融洞徹之地。是惟般憂能啓聖耳。

第三十四首 「願我衆兄弟。一嘗主之味。其味實無窮。親嘗始知美。」孔子曰。「人莫不飲食也。鮮能知味也。」聖詠作者。寢饋聖道。可謂能知味矣。又云「價值邁金石。滋味勝蜜飴。」聖言有味。甘於芳蜜。」皆由身體力行。故能深味道妙。

第三十六首 「吾人沐浴靈光內。眼見光明心怡然。」此所謂同明相照也。吾主耶穌曰。「人非天父攝引。莫能從予。」然不經聖子開導。亦不能洞悉聖父真相。不經聖神啓迪。更無從窺得三一妙身之蘊奧。當聖伯鐸祿（彼得）認耶穌爲基督時。吾主謂之曰。「在天吾父。實屬爾衷。」此乃同明相照之實例。

第三十七首 此詩宜與第四十九首及第七十三首參照。世人常謂天若有眼。爲何使小人發達。君子落魄。殊不知天網恢恢。疏而不漏。一言以蔽之曰。「君子固多難。特主終致祥。」（第

三十四首)

卷二 此卷第四十二首至四十九首。舊序謂係哥喇子孫所作。第五十首。謂係亞薩所作。第五十一首至第六十五首。謂係大維所作。第六十六首及第六十七首。不載作者姓名。第六十八首至第七十首。謂係大維所作。第七十一首。不載作者姓名。第七十二首。謂係爲所羅門所作。

第四十九首 「低首聆微言。」殆卽孔子所謂耳順歟。

第五十八首 「願其如蝸牛之消形兮。載行載滅。」此句之闡釋。泰西經學家頗持異同。莫衷一是。偶閱淵鑑類函有引見開錄云。「陰濕之下。蟲名蝸。每循牆上升。掉首弓腰。盤礴委曲。搯搯矻矻。必求前進。未半途。則沫既涎窮。精潰力竭。竟粘壁而死。」又引蘇東坡蝸牛詩云。「升高不知休。竟作粘壁枯。」可作蝸牛消形之註脚。

第六十三首 「懷德勝懷生。」原文爲「爾之仁愛貴於生命。」意謂吾之所以耿耿懷主者。非僅爲保全生命。乃爲景慕主之仁愛。有欲罷不能者焉。精神生活臻此境界。方屬上乘。

第六十五首 「靈異何爲者。所以彰正義。」宗教以正義爲目的。靈異不過工具而已。

第六十六首 「賜我鍛鍊。如銀在鎚。」云云。此爲聖詠主要教訓之一。主席蔣公亦曰。「自

古聖賢豪傑一切驚天動地的德業。莫不由艱苦患難中造成的。其所歷艱難憂患愈深。則其成功亦往往愈大。」

第六十八首 「歸斯受之。包穢包荒。」人類所獻之禮物。一經天主悅納。則化臭腐而爲神奇矣。

第六十九首 此爲預言耶穌受難之詩。

第七十一首 「笑罵由他人。造次必於是。」欲成完人。第一要獨立特行。不求人知。第二要堅忍不拔。舍命不渝。書云。「靡不有初。鮮克有終。」可不慎哉。

第七十二首 此詩預言天國降臨地上。

卷三 此卷第七十三首至第八十三首。舊序謂係亞薩所作。第八十四首及八十五首。謂係哥喇子孫所作。第八十六首謂係大維所作。第八十七首及第八十八首。謂係哥喇子孫所作。第八十九首。謂係伊士拉人以探所作。

第七十三首 「身心雖枯竭。靈魂永有託。」靈魂永生之說在舊約時代不甚昌明。此二句中。永生之信念已見曙光。

第七十六首 「世人之悲憤。適足成主榮。願將其餘怒。化爲救世音。」此言惟天主能轉禍爲

禍。化凶爲吉。吾人苟能一心依恃天主。則天地萬物必同力相助而亨通之。

第七十八首 「祭司被殺。寡婦不哭。」謂世風日下。喪禮廢棄也。

第八十四首 聖詠之中亦有賦有比。「啁啾之雀」云云。比也。「雅瑋之徒」云云。賦也。

第八十五首 此詩預言耶穌降生。

第八十七首 此詩預言聖教會。

第八十八首 此詩在聖詠中最爲悲觀。經學家謂係患癡瘋者所作。

第八十九首 此詩哀而不傷。怨而不失望。纏綿惻怛。溫柔忠厚。故泰西經學家多視爲聖詠集中傑作之一。

中傑作之一。

卷四 此卷第九十首舊序謂係摩西所作。第九十一首無序。第九十二首。謂係「爲安息

日而作。」第九十三首至第九十九首無序。第一百首序云「此係頌讚之辭。」第百有

一首。謂係大維所作。第百有二首序云「此乃窮苦無告者向主仰詠之詩也。」第百有

三首。謂係大維所作。第百有四首至百有六首無序。

第九十首 此詩風格極爲渾樸。經學家多謂或係摩西所作。而經後人略加修飾。

「願常存此念。俾啓超凡識。」「此念」原文爲「人生幾何之念。」人若常念人生之短促。

可能有二種不同之反響。其一爲及時行樂。其一爲超凡入聖。然及時行樂。猶飲鴆止渴。必至樂極生悲。惟超凡入聖。與造物者游。其樂無窮。

第九十二首 「朝誦爾仁。暮詠爾信。」聖詠文字。往往見陰陽之妙用。又如第十九首「朝朝宣宏旨。夜夜傳微衷。」及第八十五首「仁慈共妙諦。交歡正義與和平。吻合妙諦自地而萌。分正義由天而發。」竊謂猶太文字及思想。與我國最爲接近。蓋同屬東方文明也。

第九十五首 「感放涕零。昭事眞宰。」此係從公教拉丁譯本。

第九十七首 「鑿隄圍周市。幽深不可窺。仁義與正直。實爲御座基。」天主之道。玄之又玄。而天主之德。則明如日月。吾人欲師法天主。當由德而入道。蓋苟不至德。至道不凝焉。

第一百首 「何以事主。和樂且湛。」張子橫渠有言曰：『和樂道之端乎。和則可大。樂則可久。』聖保祿曰：『吾人雖處患難。亦有至樂。』絕非欺人之言。

第百有一首 此詩世稱「君王之鑑」

第百有二首 「天地終銷毀。」係用李太白成句。

第百有四首 此詩原文。經學家一致讚歎。蓋描寫自然之傑作也。

「雍雍慈鶴」原文鶴字爲 Chaiulah 此字與 Chared (仁慈) 同根。蓋鶴以慈稱耳。

第百有六首 「子子孫孫。羈旅異邦。散處各地。欲歸無鄉。」猶太民族。至今猶然。思之曷勝浩歎。

卷五 此卷聖詠多數無序。經學家認爲多係猶太人返自巴比倫後之所作也。第百有八首舊序雖云「大維之詩」然按其內容。則係取自第五十七首及第六十首。而湊成一篇。顯係後人之所編者。第百有九首舊序亦稱「大維之詩」經學者亦多懷疑。惟第百有十首實爲大維所作。即吾主耶穌亦曾引徵爲大維之言矣。第百二十首至百三十四首爲「景行歌」。蓋各方人士上耶路撒冷度節時。途中或殿中所吟之歌也。餘如第百三十八首第百三十九首第百四十一首至第百四十五首。舊序皆稱爲大維所作。

第百有七首 此詩譯者本人最感興趣。蓋適符其平生之經驗也。譯者未歸依天主以前。曾於病後作一詩云。「病痊雙耳尙喧喧。愁緒紛紛帶粥吞。家裏方知身是客。悠悠天地一孤魂。」最近復作一詩云。「宵冥詎料得生還。玉手徐開造化關。歧路興悲返故宅。天園在抱入人寰。」此兩種境界。固不可同日而語也。

第百十一首 「聖誠宜篤行。能行始有知。」此與 主席蔣公之「行的哲學」若合符節。知與行之問題。最不易解決。最近讀羅爾峯先生正信錄論知行曰。「知有解悟之知。有修行之知。

有證極之知。故無解悟之知。則修行之知無本矣。無修行之知。則證極之知無道矣。又證極之知。爲解悟修行之知之所歸宿也。」程子亦曰「不履聖賢之行。則不能入其闢奧。」主席所言「不行不能知。」「能行始能知。」乃指證極之知。「入其闢奧」之知。乃篤實踐履之結果也。

第百十九首 此爲聖詠中之最長者。古今經學家多稱之爲「聖詠中之聖詠。」文明情深。如青天之無底。

第百四十八首 凡愛天主者。必有物與民胞之感覺。無論形而上形而下。古今中外。皆屬連枝同氣。休戚相關。昔聖方濟各曾呼太陽爲兄。太陰爲妹。大地爲母。聖人書有如此胸襟。雖然。惟篤信真宰者能享此樂。而不淪於泛神論之異道。若不信真宰。而曰「乾爲父。坤爲母。」則猶數典而忘祖耳。

第百四十九首 「手執雙鋒劍。口宣誦誦音。」聖女小德蘭曾將此言適用於修行之道。渠謂吾人一方面固宜努力修行誦經。一方面又須隨時用寶劍斬截吾人所積之善行。庶幾爲而不恃。成功而不居。心中灑脫。非惟不爲惡行所染。抑且不爲善行所累。此卽耶穌「莫令左手知悉右手所爲之善」之心傳也。聖保祿曾言「人生在世。爲日無多。故有憂當者無憂。有樂

當若無樂。有財當若無財。入世當若出世。吾人可補充之曰。有善當若無善。有德當若無德。
老子曰。『上德不德。』其斯之謂歟。

參考書

本編翻譯初稿。大都係依據斯溫當司鐸聖詠聖歌之英譯 (James M'Swiny, Translation of Psalms and Canticles with Commentary, 1901年倫敦 B. Herder 書局出版。具有 Hebrew-Masoretic Text 及 Vulgate Version 兩行並列之英譯。) 其他參考書籍擇要錄後。以供世之道友有心於此者。作進一步之探討焉。惟此次譯稿。成於抗戰期間。文獻羅致。艱難之至。承于總主教。羅民勞主教。那明經神父。費悅義神父。方杰人神父。徐宗澤神父。蒲魯士神父。師仁傑神父。范介萍神父。鍾志漁神父。葉忠祥神父。陳道南神父。梅雨絲神父。吳應楓神父。王方神父。明興禮神父。彭廉石神父。及葉秋原。袁承斌。程石泉。慕大恩。陳如一諸先生之慨予協助。始克彙集下列極可珍貴之資料。善功美意。並此誌謝。

西文參考

The Holy Bible, Translated from the Latin Vulgate.

The Psalms, New Latin-English Version approved by Pope Pius XII.

Callan and McHugh, The Psalms Explained.

Pannier, Les Psaumes d'après l'hebreu.

Crampon, La Sainte Bible.

Fillion, Le Livre des Psaumes.

Cales, Le Livre des Psaumes.

Bird, Commentary on the Psalms.

King James' Version of the Holy Bible.

Delitzsch, Commentary on the Psalms.

Kirkpatrick, The Book of Psalms.

American Standard Version of the Holy Bible.

Die Bibel, Nach der deutschen Übersetzung D. Martin Luthers.

The Holy Bible, A New Translation by James Moffat.

Spurgeon, The Treasury of David.

中文參考

聖詠經 京都東教宗北館譯本光緒二十七年上海商務印書館攝版

詩篇 徐家匯圖書館所藏抄本譯者未詳

新舊約聖書「文理本」 聖書公會印發

新舊約聖經「淺文理本」 美華聖經會印發

新舊約全書「國語本」 聖書公會印發

耶穌降生第一千九百四十六年九月二十四日立聖母贈擲瞻禮日

吳經熊附誌於上海寓廬

